

Iphe, Jizosu Goshiru Jiṅnu Lẹ Ophulenya

1 ¹Ọwa-a bụ ophulenya Jizosu Kéreshi, Chileke nṅuru iya g'o goshi ndu ejeru iya ozi, bụ iphe, aduedu g'oo-nọ-beru l'oomee. Tọbudu iya bụ; Jizosu Kéreshi bya ezia ojozi-imigwe iya sụ g'o je atuko iphe ono g'o ha goshi Jiṅnu, bụ onye-ozii iya. ²Ọo iphemiphe, Jiṅnu hūmaru bẹ ọ tukuru g'o ha pfukọta-a. Ọ bṅuru l'ekwo-a l'eka-a bẹ Jiṅnu tukuru opfu ono, Chileke pfuru ono deshikọta. Iphemiphe ono bukotaru okpobe-opfu, Jizosu Kéreshi ono goshikotaru iya. ³Ọnu-oma bẹ a goru nṅuru iphe, bụ onye agụ ekwo-a, e deru opfu, epfuchiru Chileke-a mę ndu nūmaru iya nṅuru; ngabę iya nchị bya emeje iya ememe; noo lẹ teke iphemiphe-a l'e-mekọta bẹ zaakwaru ntse.

Jiṅnu l'ekele Chiochi ęsaa

⁴Ọo mbędua, bụ Jiṅnu bẹ ekele unubę Chiochi ęsaa ono, dukota l'alị Eshiya ono ekele. Mu sụ g'eze-iphe-oma yę ęhu ọdu guu, shi Chileke l'eka tso unu. Chileke ono bụ onye nọ ndzụ; bya aburu onye shihawaa nọduta tẹmanu mgboko dṅuru; bya aburu iya bụ onye ono, abya nṅuru ono. G'eze-iphe-oma, shi iya l'eka; mękwapho ophu shi l'eka Unme ęsaa Chileke bṅuru k'unu jeyewaruroya. Unme ęsaa, mu epfuru bṅuru Unme ęsaa ono, lanọduje l'atatiphu Chileke l'eka ọ nọ l'aba-eze iya ono. ⁵Eze-iphe-oma yę ęhu-guu ono shikwapho Jizosu Kéreshi l'eka onye l'apfushije ike l'iphemiphe, o pfuru anyi; bya aburu onye mbṅuru, Chileke meru o teta nọdu ndzụ. Ọ bukwaru iya pho bṅuru onye-ishi iphe, bukotakpoo ndu bṅuru eze lẹ mgboko-a.

Ọ bṅuru onye yekpoo ru anyi obu; k'ophu ọ nwuhu-chiru anyi anwuhu, anyi gege anwuhu. Ọ bṅuru mee ya b'o gude tọo anyi l'ęgbu ono, iphe-ęji shi kee anyi ono. ⁶Ọ bya emee anyi; anyi bṅuru eze; bya aburu uke Chileke; ndu ejeru Chileke, bukwapo Nna iya ozi. G'ajaja mę ike bukotaru kę Jizosu jasṅuru lẹ tuutuutuu lẹ miiimii. Nokwa g'o dṅuru.

⁷Unu lekwa l'ọ nọakwa anọno l'urwukpu abya. Onyemonye l'e-gude ęnya iya hūma iya. Iphe, bṅuru ndu ono, tṅuru iya arwa ono bẹ a-humakwa

iya phọ. Ọhamoha, dọ lẹ mgboko-a bẹ l'a-rakọta ejo ẹkwa; ẹka meji a-tofufu pẹ me ọ -byaẹpho. Noo iphe, e-me nọ bọ onoya. Nokwa g'ọ dọ.

8“Ọ mbẹdua bọ Alufá bya aburu Omega. Mu bọ onye mbọ bya aburu onye ikpazụ.” Nokwa iphe, Nnajiuphu, bọ Chipfu eepfu; mbọ onye ono, bọ iya bọ Ọkalibe-Kakọta-Ike; bya aburu onye shihawaa nọduta tẹmanu mgboko dọ; bya aburu iya bọ onye ono, l'abya nọ ono.

Ahuma Kéreshi l'ọphulenyà

9Ọo mbẹdua bẹ bọ Jionu, bukwapo nwanna unu. Mu bọ onye mu l'unu tukuru buru ndu ẹpẹ lẹ Jizọsu tẹgbaru buru nanu l'ẹje ejo iphe-ẹhuka-a, anyi eje-a. Mu l'unu tukurupho nweru ọta-nshi. Ọ buru ẹgube ono bẹ anyi e-mechakwapo tuko gbarụ mgbà nweru mgboko ọphúú ono, l'e-shi Chileke l'ẹka ono. Lọ nweru teke a kpọtajeru mu je edo-be l'ali, ẹnyimu sọ-pheru. Iphe, eekuje ẹka ono bọ Patumosu. Iphe, e gude kpuru mu laa ẹka ono bọ l'ọle mu asa opfu Chileke asasa; mekwapho lẹ mu anọduje epfuru ndu ọzo l'edzudzu-ọha k'ọkpobe iphe ono, Jizọsu Kéreshi goshiru mu ono. 10Tọbudu iya bọ; o be l'eswe ujiku lanu, bọ eswe Nnajiuphu; Unme Chileke bya ejiẹ mu phọ ẹhu pyimu. Mu wata aphu ọphulenyà. Mu numa olu-opfu, kwata adashikpo ike ike ike g'onye egbu opu-ọgu l'uzo azu mu. 11Olu ono sọ: “Ọ kwa mbẹdua bọ Alufá bya aburu Omega; mu bọ onye mbọ bya aburu onye ikpazụ. Tukurupho iphe, iibya ahuma-a dekota l'ekwo; zikaaru Chiochi ẹsaa-a, nọ lẹ Eshiya; mbọ ndu Chiochi, nọ lẹ Efesosu; waa ndu kẹ Sumena; me ndu kẹ Pegamomu; waa ndu kẹ Tayatayira; waa ndu kẹ Sadisu; waa ndu kẹ Filadelufiya; me ndu kẹ Layodeshiya.”

12Mu bya aghaa ẹnya l'azọ gẹ mu humaeshikwa onye ono, epfu eyeru mu nọ onoya. Mu ghaa ẹnya ono mu huma orọku ẹsaa e mekotaru lẹ mkpọla-ododo. 13Ọ duru onye dọepho gẹ Abubu-Ndiphe, yekotærupho akpawuru uwe, l'akpa iya l'ogba-echi pfuru lẹ mgbaka orọku ẹsaa ono. Uwe ono bẹ e gude akpo-mkpọla-ododo kebuta iya l'unme. 14Egbushi, dọ iya l'ishi nọdu achaepo kẹ phuuphuu g'ẹji aturu, maru acha ucha; mbọ kwata acha pemu pemu g'aka-mini-sunoo. Ẽnya iya dọepho g'iphóro ọku, enwu enwunwu. 15Ọkpa iya labọ chakọta ziriri gẹ mkpurukpu-igwẹ, ama mma, a huru l'ọku jeye ọ chaa achacha; mbọ huta iya jasọ o gbuchafu. Olu-opfu iya dọepho g'ẹka eze mini aphu gbudugbudu. 16Ọ chiru kpokpode ẹsaa l'ẹkutara iya. Ogu-echi, atsọ nkọ akpatiphu labọ nọdu alufutaje iya l'onu. Iphu onye ono nọdu egbuepho nwjinwii g'ẹnyanwu keru l'ishi. 17Mu huma iya bya adaa ya kpurumu lẹ mgboru ọkpa; dabyierupho g'onye nwuhuru anwuhu. Ọ bya ebyibe mu ẹkutara iya bya asu mu: “Ndzọ b'agushi ngu. Ọo mbẹdua bọ Onye Ivuzọ bya aburu Onye Ikpazụ. 18Ọo mbẹdua bọ onye ono, shi nwuhu anwuhu; ọle mu nọwaa ndzọ ojejoje nta-a. Nokwa g'ọ dọ. Ọ kwa mu gude ire-igodo ọku-ali-maa me

k'anwuhu. ¹⁹Dee iphemiphe-a, i humawaru-a l'ekwo waa iphe, du nta-a; mekwapho iphe, e-me l'iphu. ²⁰Waa iphe, e domiru edomi du le kpokpode esaa-a pho, i humaru l'ekutara mu pho; ye le oroku mkpola-ododo esaa pho. Kpokpode esaa ono be bu unwu-ojozi-imigwe, l'anoduje eletagbaa Chiochi esaa ono enya; oroku esaa ono buru Chiochi esaa obu.”

Ozi, Kereshi ezi Chiochi Efesosu

2 ¹“Waa iphe, ii-de nu ojozi-imigwe ke Chiochi Efesosu baa: Owa-a bu ozi, onye ono, chi kpokpode esaa l'ekutara ono ziru; onye ejephe le mgbaka oroku mkpola-ododo esaa ono. ²Mu makotakwaru iphemiphe, iimeje g'o ha; mu maru g'iijeshiberu ozi ike; bya amaru g'ii taberu iphe nshi. Mu maru l'i ti kwejedu ge ndu eme ejo-iphe shita aka i no. Li huchawaru iphe, bu ndu ono, suru lephe bu ndu-ishi-ozu ono ama; mbu ndu suru lephe bu ndu-ishi-ozu; lebe abu lephe bu iya; i shi egube ono maru lephe bu ndu ntuphu-ire. ³Mu makwaru-a l'i tajeru iphe nshi; l'i jewaru iphe-ehuka, du shii l'opfu eh u mu; ophu ike abvuduru ngu; ⁴ole-a; o nweerupho oru, mu humaru ngu lehu. O to buedu g'i shi yee mu obu bu g'i yeru mu iya nta-a. ⁵Nyatanu aka o jeberu uzo kpo-swehu ngu. G'izimanu lwa ngu azu; g'i wata eme iphe ono, i shihawaa le mbulembu meta ono; odumeka be mu a-byapfutakwa ngu egwegwa; bya apafu oroku ngu leka o pfuru; gbahaa l'izimanu lwaru ngu azu. ⁶Ole g'o duhabe; iphe, mu aja ngu ajaja iya bu lejo-iphe ndu ogbo Nikolasu ono eme be du ngu ashu; o buru g'o dukwa mu pho ashu bu ono.

⁷“G'onye nweru nchi ngabekwa iya numa iphe-a, Unme Chileke epfu anu iphe, bukpo Chiochi gephe ha-a.

“O kwa iphe, bu onye alwuje ugu ono lwuta be mu e-kwe g'o ria akpu-ru oshi ono, emeje g'a nodu ndzu ono; mbu oshi ono, pfuru l'okpoku Chileke ono.

Ozi, Kereshi ezi Chiochi Sumena

⁸“Waa iphe, ii-de nu ojozi-imigwe ke Chiochi Sumena baa:

“Owa-a bu iphe, oopfu mbu onye ono, bu onye ivuzo bya aburu onye ikpazu; onye ono, shi nwuhu anwuhu; ole o dzuwaa ndzu ozo ono. ⁹Mu makwaru-a l'ije iphe-ehuka; teme i nodu akpa nri; obenu l'i nweru iphe shii. Mu makwaru-a epfubyishi ono, ndu ono, suru lephe bu ndu Jiu lebe ephe abu iya ono epfubyishi Chileke ngu ono; ndu ono bu ulo-ndzuku ndu abajeru Nsetanu aja. ¹⁰Ii byakwa eje iphe-ehuka nta-a; ole o o ge ndzu ba agukwa ngu. Unu lekwa; Obutuswe a-hakwaru unu chita je atushia mkporo; g'e shi aka ono hua unu ama. Mbu l'unu e-je iphe-ehuka ujiku iri mkpurophu. Ole; noduekwa mu pho leka g'i no iya jasu l'egbua ngu egbugbu; e-mechaa mu ekpube ngu okpu-eze ono, bu ndzu.

¹¹“G'onye nweru nchi ngabekwa iya; numa iphe-a, Unme Chileke epfu anu iphe, bukpo Chiochi gephe ha-a.

“L’ò kwa iphe, bụ onye alwùje ògu ono lwùta bẹ bụ onye a ta abyadu ekwe g’ònwu mgbu labò gbua.”

Ozi, Kéreshi ezi Chìochi Pegamòmu

¹² Teme waa iphe, ii-de nù ojozi-imigwe kẹ Chìochi Pegamòmu baa: “Òwa-a bụ ozi, onye ono, gude ogu-echi, atsù nkò akpata iphu labò ono ezi. ¹³ Mu makwarù-a l’i bu l’èka aba-eze Nsetanu nò anòno. Obenu l’i gudeshièpho epha mu; òphu ì gojeduru ègo l’i ti kweèdu nkemu; mbùkponu teke ono e gburu Antipasù l’èka Nsetanu bu ebubu; opfu l’òo l’ò pfuru ledzudzu-òha pfua l’òo mu bẹ ya nò l’èka ono. ¹⁴ Òle o nweèkwarupho iphe olemole, bụ òru, mu hùmaru ngu l’èhu. O nweru ndu harù nòdu ngu l’ime, bụ ndu eme èjo-iphe, èphe nwùtaru l’èka Belamu, bụ onye ono ziru Belaku g’o-shi dephua ùnwu Ìzurelù; deru phẹ ye l’eri iphe, a gwarù iphe; yele apharwùshi onwophẹ. ¹⁵ Nokwaphò g’ò dùru ndu nò l’echilabò unu; eme iphe ono, ndu ògbo Nìkolasu ezi ono, bükwapho iphe, dù mu ashì-a. ¹⁶ Òo ya bụ; g’izimanù lwakwa unu azù; òdumeka bẹ mu a-byapfutakwa unu l’èka-ègwa bya egude ogu-echi ono, shi mu l’ònu ono gude tsoo ègube ndu ono ògu.

¹⁷ “G’onye nweru nchì ngabèkwa iya; nùma iphe-a, Unme Chileke epfu anù iphe, bụ Chìochi g’èphe ha-a.

“Ò kwa onye alwùje ògu ono lwùta bẹ mu a-harù nri ono, bụ mana ono, Chileke domiru edomi ono; waa mkpuma òchaa ono, e deru epha òphúú ono. Epha ono ta adùdu onye òzo, maru iya nù; gbahaa onye ono, a nùru iya ono.

Ozi, Kéreshi ezi Chìochi Tayatayira

¹⁸ “Waa iphe, ii-de nù ojozi-imigwe kẹ Chìochi Tayatayira baa: ‘Òwa-a bụ ozi, Nwa Chileke ono ezi; onye ènya iya dùepho g’ìphóró òku, enwu enwunwu; teme òkpa labò chakòta iya kẹ zìriri g’oipe, a hùru l’òku o gbu-chafù egbuchafù. ¹⁹ Mu makòtakwaru-a iphemiphe, unu emeje g’ò ha. Mu maru n-yemobu unu; maru g’unu yeberu èhu l’ozi bya amaru ekweta unu; maru g’unu ataberu iphe nshi; maru ozi unu. Mu maru l’iphe, unu eme nta-a bẹ nyìberu iphe, unu shi eme lẹ mbù. ²⁰ Òle-a; o nweèrupho òru, mu hùmaru unu l’èhu: Unu kweru g’èjo nwanyì ono, bụ Jiezebelù nòdu l’echilabò unu, bụ nwanyì òphu asùje lẹ ya bụ onye-mpfuchiru Chileke; unu haa ya ò nòdu ezi iphe; gude iya mee ndu-ozì mu èphe nòdu apha-rwùshi onwophẹ; eri iphe, a gwarù iphe. ²¹ Mu hakpòoru iya ùzo nòo òdu g’ee-shi g’izimanù iphe-èji iya lwa iya azù; òphu o kwedu g’izimanù lwa iya azù g’ò haa apharwùshi onwiya. ²² Mu abyakwa iya eme g’ò zèe l’èhu, e-mee iya l’ò kwaa l’ùlo. Ndu ono, èphe l’iya azeje ono bẹ mu e-me g’èphe jee èjo oke iphe-èhuka, parù èka apaa; gbahaa l’izimanù iphe-èji phẹ lwarù phẹ azù; èphe haa etso nwanyì ono. ²³ Ùnwu iya g’èphe ha bẹ mu

e-chigbushikọta echigbushi. Ọo ya bụ g'iphe, bụ Chìochi g'ẹphe ha amakwanuru l'ọo mbedua bụ onye ono, l'enyochaję uche nemadzu; nyochaa ọkpoma iya maru iphe dū iya l'egomunggo ono. Sụ-a; g'unu hakotakpoo l'onye l'onye bę mu a-nukotachaa aphụ gbaru iya nū l'ẹhu l'ẹhu. Onyemonye bę mu a-nū aphụ lę g'iphe, o meru gbaru.

24 “A bya l'unubę ndu ophu bukwapho lę Tayatayira; unubedua te ekwedu ye ęka l'ejo-iphe ono, ndu ono ezi ono. Unubedua bụ ndu ophu amadu iphe ono, o nweru ndu ahajeru sụ l'ọo iphe, e domigbaru edomi k'ẹhu Nsetanu. Unubedua ta adụekwa iphe ọzo, mu asukwadu g'unu mee. 25 Ọ buẹpho lę-a; g'ọ dūhabe; unu chikwaru ęka labo kwęe l'iphe ono, buwaa k'unu ono gudesia ya ike jasụ teke mu a-bya ọzo. 26 Ọ kwa onye alwuje ọgu ono lwuta yęe onye emeje iphe, mu pfuru; mbụ onye gude iya ememe jeye l'ikpazu; nokwa onye mu e-ye iya l'ęka g'ọ buru onye-ishi ohamoha. 27 Oo-gude mgborigwẹ buru ishi ohamoha; gwee ohamoha ono uji. Ono buru iphe, Nna suru gę mu mee. 28 Ọzo bụ lę mu a-nukwa iya pho kpokode nchi-abo hu.

29 “G'onye nweru nchị ngabekwa iya; numa iphe-a, Unme Chileke epfu anụ iphe, bụ Chìochi g'ẹphe ha-a.”

Ozi, Kéreshi ezi Chìochi Sadisú

3 1 “Waa iphe, ii-de nū ojozi-imigwe kę Chìochi Sadisú baa: “Owa-a bụ ozi, onye ono ezi; mbụ onye ono gude Unme ęsaa Chileke ono waa kpokode ęsaa ono. Mu makotakwaru-a iphemiphe, unu emeje g'ọ ha. Laanoduje eku unu ndu nọ ndzụ; ọle unu bụ ndu nwuhuru anwuhu. 2 Ọ tọ dükwa g'ọo-nọ-beru nta-a iphe obu, unu nweru obu anyihu ęnya ree. Ọo ya bụ; unu tehukwa nwuru ęnya; kwaberu iya ęnya k'ophu ọo-rọ-kerehu. Mu daleakwaru unu humawaa l'iphemiphe, unu eme ta adudu ophu unu metabewaru g'ọ gbaru l'iphu Chileke mu. 3 Ọo ya bụ; unu nyatajekwapho ozi-oma ono, unu gude nchị unu numa kwetakwapho ono. Unu pfukwarupho pfushia ike l'iphe ozi-oma ono epfu. G'izimanu lwakwa unu azu. Teke o bụ l'unu te etehuduru nwuru ęnya bę mu atukwa unu l'uzorehu; mbụ byaepho g'onye-oshi, ata dudu onye amaję teke ọobya. Ọo ya bụ l'unu ta abyadu ama teke mu a-byapfuta unu. 4 Ọle g'ọ dūhabe; o nwekwaru nwumadzu olemole, unu l'ephe nọ lę Sadisú; ndu te emerwushiduru uwe phe. Ọ buru ndu ono bę e-ye uwe ocha; mu l'ephe eburu; kęle ephe goshiwaru l'ọo iphe ono rwuberu phe. 5 Ọ kwa onye alwuje ọgu ono lwuta bę e-ye uwe ocha ono. Ophu mu abyakwa ehufu epa onye ono l'ekwo, e deshuru epa ndu dzu ndzụ ojejoje. Mu a-pfuru l'iphu Nna mu; mę l'iphu unwu-ojozi iya, nọ l'imigwe; pfua ya hoo haa l'onye ono bę bukwa onye nọ mu l'ęka.

6 “G'onye nweru nchị ngabekwa iya; numa iphe-a, Unme Chileke epfu anụ iphe, bụ Chìochi g'ẹphe ha-a.”

Ozi, Kéreshi ezi Chìochi Filadelufiya

⁷Waa iphe, ii-de nù ojozi-imigwe kẹ Chìochi Filadelufiya baa:

“Owa-a bụ ozi, onye ono, dụ nsọ bya aburu onye ire-lanụ ono ezi. Onye ono, bụ iya gude ire-igodo eze ono, bụ Dévidi. Onye abụjeru: ọ -gụhaa ụzọ; ọ tọ duedu onye ọzọ asuru iya agụ-chi; teke ọ gụ-chiru iya agụ-chi; ọ tọ duedu onye ọzọ sūru iya agụha. ⁸Sū-a; mu makotakwaru-a iphemiphe, unu emeje g'ọ ha. Mu gūhaakwaru ụzọ gheberu unu ọnu; ọphu ọ dukwa onye sūru iya agụ-chi agụ-chi. Mu makwaru-a l'ike ta adu-zidu unu; ọle unu pfulẹkwaru-a pful-shia ike l'opfu ono, mu pfuru ono; unu nọdu emekwa iya phọ ememe; ọphu unu agojedu ẹgo l'unu ta abudu ndibe mu.

⁹“Iphe unu a-huma bụ lẹ ndu ono bụ ndu ndzukọ ọphu abajeru Nsetanu eja ono; ndu ono adzujẹ ụka sū l'ẹphe bụ ndu Jiu l'ẹbe ẹphe abụ iya ono; ndu ono bẹ mu e-me: ẹphe abya egbushi ikpere l'alì baaru unu eja. Noo gẹ mu e-shi mee: ẹphe amaru lẹ mu yeru unu obu bụ ono. ¹⁰Eshinu unu taru nshi ono, bụ iya bụ iphe, mu karu unu g'unu meje ono; bẹ mbẹdua e-gudeshikwaphọ unu mẹ ọhutama -byaephọ; mbụ ọhutama ono l'abya l'eliphe l'ophu; g'ọ hụa iphe, bụ ndiphe l'ophu ama ono. ¹¹Ọ tọ dukwa g'ọo-nọ-beru mu abya. Unu gudeshikwa iphe ono, bụwaa k'unu ono ikike g'ọ tọ dụ onye l'anata unu okpu-eze ono. ¹²Ọ kwa onye alwuje ọgu ono lwuta bẹ mu e-me g'ọ buru itso nọ l'ime eze-ulo Chileke mu; ọphu ọo-lu-fubaedu iya alufu. Mu eworu ẹpha Chileke mu dee ya l'ọnu-iphu; dekwaa ya phọ ẹpha mkpukpu kẹ Chileke mu ono, bụ iya bụ Jierúsalemụ ọphúú. Mkpukpu ono bụ l'imigwe ẹka Chileke mu ono nọ bẹ oo-shi bya. Mu abya edefukwaa phọ ẹpha ọphúú nkemu l'ọnu-iphu onye ono.

¹³“G'onye nweru nchị ngabekwa iya; numa iphe-a, Unme Chileke epfu anụ iphe, bụ Chìochi g'ẹphe ha-a.

Ozi, Kéreshi ezi Chìochi Layodeshiya

¹⁴“Waa iphe, ii-de nù ojozi-imigwe kẹ Chìochi Layodeshiya baa:

“Owa-a bụ ozi, oozị; mbụ onye ono, ẹpha iya bụ: Nokwa g'ọ dụ”; mbụ onye ono, ọ gbaru kẹ g'e gude ire iya ẹka l'iphemiphe, oopfu ono; bya aburu iya bụ onye pfuru anyi okpobe-opfu Chileke; bya abukwaru iya phọ bụ onye iphemiphe, Chileke meru dobe lẹ mgboko shi l'ẹka. ¹⁵Mu makotakwaru-a iphemiphe, unu emeje g'ọ ha; l'unu te ejidu oyi ọphu unu evudu ọku. Unu gege anọdu eji oyi; ọzoo l'unu evu ọku. ¹⁶Ọo ya bụ; l'eshinu unu dụ wuruwuru; unu te ejidu oyi ọphu unu evudu ọku bẹ mu a-gbūfu unu. ¹⁷L'unu anọduje aba abaa enweru iphe; l'iphe akabẹ kweru unu; l'ọ tọ dukpoda iphe ụko iya duru unu. Nshio unu; unu ta amaduro l'unu dụ k'ayoru oshi; l'unu akpa nri; unu nọdu atsụ ishi bya agbakwaru phọ ọto. ¹⁸Ọo ya bụ l'idzù, mu a-chiru unu nta-a bụ g'unu bya azuta mu mkpola-ododo mbụ ọphu a kpuru l'ọku-uzu; k'ọphu aduedu mkpaba dụ

iya nū; g'oo-mee unu g'unu b̄uru ndu nweru iphe; unu abyakwapho bya az̄uta mu uwe ōchaa g'unu yeje g'unu ta agbah̄eru ōto; ōo ya b̄u g'iphe-re ad̄u-buhu unu. Unu az̄utakwa mu pho obvu ēnya tee l'enȳa ono g'unu awata aph̄u ̄zo. ¹⁹L̄o kwa ndu mu yeru obu b̄e mu abaj̄eru mba; h̄ua ph̄e ah̄h̄u; g'ephe maru iphe. Ōo ya b̄u; unu gude n̄u obu unu g'̄o ha meje ḡe mu pfuru ono; g'iziman̄u iphe-ēji unu lwad̄upho unu az̄u. ²⁰Unu lenu; mu pf̄uakwaru l'̄onu mgbo ak̄u ēka l'̄uzo. Onye n̄umaru olu mu; ḡuhaaru mu ̄zo; mu abata; mu l'iya erigba nri; onye eria k̄e nwibe iya; onye eria k̄e nwibe iya. ²¹Ō kwa onye alw̄uje ōgu ono lw̄uta b̄e mu e-kwe g'̄o n̄o-kube mu l'aba-eze mu; b̄unaa ḡe mb̄ēdua lw̄uru lw̄uta bya an̄o-kube Nna mu l'aba-eze iya-a.

²²“G'onye nweru nch̄i ngab̄ekwa iya; n̄uma iphe-a, Unme Chileke epfu an̄u iphe, b̄u Ch̄iochi g'ephe ha-a.”

Abar̄u Chileke ēja l'imigwe

4 ¹T̄obudu iya b̄u; ono bv̄uchaepho mu byakwa elee ēnya ōzo; h̄uma ̄zo, gheru ̄onu l'imigwe. Olu mb̄u pho, mu shi n̄umahawaa pho; mb̄u olu pho l'ada g'opu-ōgu pho; s̄u mu: “Nyikota byakp̄odapho l'ēka ḡe mu goshi ngu iphe, e-me l'iphu.” ²G'e jia epfua Unme Chileke bya ejiana mu-a ēhu pȳimu. E jeshia ele ēnya; e dobewaa aba-eze l'imigwe l'ēka ono. Ō d̄ukwarupho onye n̄o iya n̄u. ³Onye ono, n̄o iya n̄u ono n̄odu egbuepho k̄e nw̄iinwii ḡe m̄kpuma j̄as̄up̄a. Iphu iya n̄odu eke zaazaa ḡe m̄kpuma kan̄eliȳan̄u. Iphe n̄o-ph̄eru aba-eze ono mgburugburu b̄uru ēko-mini, ekelepho oyingo oyingo ḡe m̄kpuma, b̄u emeral̄udu. ⁴Aba-eze ̄kporo l'̄eno ōzo n̄o-ph̄ee aba-eze ono mgburugburu. Ndu b̄u ōgerenya ̄kporo l'̄eno n̄oduchaa an̄o l'aba-eze ono. Ēphe yek̄otaepho uwe, achagbaa pemu pemu. Ēphe bya ekpugbaaru okpu-eze l'ishi. Okpu-eze ono g'̄o ha b̄e b̄u-kota m̄kp̄ola-ododo b̄e e gude w̄ua ya. ⁵Ebemu-igwe n̄odu eshijeepho l'ēka ono, aba-eze ono n̄o ono al̄o k̄e waa waa. Igwe n̄odu ede riiriiri; ara ōrà; at̄u egbigwe. Oroku ēsaa n̄odugbaa l'iphu aba-eze ono enwugbaa jaja-ja, b̄u iya b̄u Unme ēsaa Chileke ono. ⁶Iphe, d̄ufukwaapho l'iphu aba-eze ono b̄u iphe, d̄u g'eze-ēnyimu, aph̄u ngerengere g'iphe, e gude onyo mee.

O nweru iphe ēno, n̄ogbaa ndz̄u n̄o l'echilab̄o aba-eze ono. Iphe ono bya an̄o-ph̄ekwaapho aba-eze ono mgburugburu. Iphe ēno obu t̄ukoepho iphe, b̄u ēhu iya l'ophu g'ēhu iya ha mokash̄ia ēnya ēnya; iphu l'az̄u. ⁷K̄e mb̄u b̄e d̄u g'oduma; k'ēbo d̄u ḡe nwa oke-eswi; k'ēto b̄e nweru iphu d̄u ḡe k̄e nemadz̄u; k'ēno d̄u g'ugo, ephe l'eli. ⁸Iphe ēno ono, n̄ogbaa ndz̄u ono nwe-gbachaaru n̄k̄u ishii ishii l'ēhu l'ēhu. Ēhumehu b̄ukotar̄u ph̄e ēnya ēnya m̄e eli ēhu ph̄e m̄e l'ime ēhu ph̄e. Eswe m̄e ēnyashi ta ad̄udu teke ēphe ta an̄oduj̄edu aḡu ebvu s̄u:

“Ns̄o! Ns̄o! Ns̄o!

b̄e Nnajiuphu ono,

bù Chileke, bù iya
 bù
 Ọkalibe-Kakọta-Ike
 dọ.

Ọo ya bù Chileke ono,
 shihawaa nọduta
 tẹmanu mgboko dọ ono;
 bya aburu onye nọ
 ndzọ nta
 bya aburu iya bù
 onye ono,
 abya nọ ono.”

⁹Iphe ẹno ono, nọ ndzọ ono bẹ agọ ebvu aja onye ono, nọ ndzọ ojejoje ono ajaja; onye ono, bù iya nọ l'aba-eze ono; tẹme ẹphe nọdu agukwa iya phọ gude akwabẹ iya ùbvù; bya egude iya etu iya ẹpha. No iya; ọ nọdu abujeru teke ẹphe gurerupho ebvu ono; ¹⁰ndu bù ọgerenya ukporo l'ẹno ono adakọtaepho kpurumu l'iphu onye ono, nọ l'aba-eze ono baaru iya ẹja; mbù onye ono, bù iya nọ ndzọ ojejoje ono. Ẹphe abya ekpushia okpu-eze phẹ woru wushi l'iphu aba-eze ono gọa ebvu sọ:

¹¹“Ọ gbakwarọ ngu gube
 Nnajiuphu bya aburu
 Chileke anyi;
 g'aatuko g'a ha jaa ngu
 ajaja;
 kwabẹ ngu ùbvù;
 anuru ngu opfu
 l'ọo ngu kachaa ike.
 Noo kẹle ọo ngu meru
 iphemiphe dobe.
 Ọo l'ọ dọ ngu l'uche meru
 g'o gude ẹphe dọ;
 buru iphe,
 e meru dobe.”

**Nwaturu-ngweja, shi l'ẹka Chileke
 yẹle ẹkwo, a phuru aphuphu**

5 ¹Tobudu iya bù; mu bya ahuma l'ọ duru ẹkwo, a phuru aphuphu, o gude l'ẹkutara; mbù onye ono, nọ l'aba-eze ono. Ẹkwo ono bẹ e deru iphe l'iphu; dee ya l'azọ. A phụ-chia ya aphụ-chi gude iphe-ọhubama ẹsaa nyachishia ya. ²Mu bya ahuma ojozi-imigwe lanu, e yeru ike, ha shii l'ẹka; ẹka ọora iya arara arashi iya ike asuje: “?Bù onye bù onye a-sọ lẹ ya maru onwiya; lẹ ya gbaru k'anyashi iphe-ọhubama ono, e gude

nyachishia ẹkwo ono, a phuru aphuphu ono; ?onye a-bya anyashia ya phuhāa?”³ Ophu ọ dudu me onye lanu l'imigwe; ozoo l'eliphe; ozoo l'ime-alì, duru ike phuhāa ẹkwo ono, a phuru aphuphu ono; ophu ọ bu ke lee ya enya l'ime. ⁴Enya-mini buru mu vurukutuku l'enya l'ọ to dudu onye a humaru, gbaru k'aphuha ẹkwo ono, a phuru aphuphu ono; ophu ọ buru onye eje epfu ke lee ya enya l'ime. ⁵Tobudu iya bu; onye lanu l'ime ndu bu ogerenya ono su mu: “Ta arashi ẹkwa! Lekwa l'onye ono, bu Oduma ke Jiuda; mbu oshilokpa Dévidi ono lwuakwaru ogu ono lwuta. O buru iya bu onye a-du ike phuhāa ẹkwo ono, a phuru aphuphu ono nyashia ya iphe-ohubama esaa ono, e gude nyachia ya ono.”

⁶No iya; mu bya ahuma Nwaturu ono l'eka ọ pfuru le mgbaka abaeze ono yee iphe eno pho, nogbaa ndzu, no l'echilabo ndu bu ogerenya ukporo l'eno ono. Nwaturu ono be dupeho g'e gbujehawaru iya egbugbu. O furu mpu esaa; mokwaapho enya esaa, bu iphe, no-chigbaaru enya Unme esaa Chileke; mbu Unme esaa, Chileke ziru g'ephe gbakashihu dzuru mgboko l'ophu. ⁷O gbalihu bya ejepfu onye ono, no l'aba-eze ono bya anata iya ẹkwo ono, a phuru aphuphu ono, o gude l'ekutara ono. ⁸O wotaepho ẹkwo ono; iphe eno ono, nogbaa ndzu ono me ukporo ndu bu ogerenya le ndu bu ogerenya eno pho toko daa kpurumu l'iphu Nwaturu ono baaru iya eja. Ndu bu ogerenya ono toko pagbaaru eze une l'ehu l'ehu bya egudegbakwaapho eze-ochi, e gude mkpola wua. Iphe dugbaa ya nu bu unwu-isensu, enwuru-oku iya anoduje eshi kwekweekwee. Enwuru-oku iya ono no-chiru enya epfupfu ono, ndu-nsọ anoduje epfu anu Chileke ono. ⁹No iya; ndu bu ogerenya ono nodu agu ebvu ophuú asuje:

“Oo ngu gbaru k'ewota ẹkwo ono;
nyishia ya iphe-ohubama ono,
e gude nyachishia ya ono.

E gburu ngu egbugbu;
I gude mee ngu gbataru
Chileke nemadzū;
mbu ndu shigba
l'ipfu l'ipfu g'ipfu
hagbukpo l'ophu;
me le ndu shikota l'iphe,
bukota opfu-alì ndu
du iche iche,
no le mgboko-a;
me mkpukpu le
mkpukpu ge
mkpukpu hakpo l'ophu;
mekpoo ohamoha kpọ
mgburugburu.

10 I mee phẹ: ẹphe bụgbaaru eze
 bya emekwaa phẹ phọ:
 ẹphe bụgbaaru uke kẹ
 Chileke anyi.

Ọ bụru phẹ a-bụru ishi
 ndiphe l'ophu.”

11 Tọbudu iya bụ; mu bya ahuma unwu-ojozi-imigwe, du igwerigwe. Mu nọdu anukwapho olu phẹ. Ojozi-imigwe obu bukwa unubuku unubuku ugbo olemole; mbu le-a; ẹphe habekpọephe l'igwerigwe; k'ophu bu l'ọ tọ dudu onye adu ike aguta phẹ l'ogu. Ẹphe tuko g'ẹphe hakota; ẹphe l'iphe eno pho, dzugbaa ndzu pho; me ndu bu ogerenya pho; tuko g'ẹphe ha pfu-pee aba-eze ono mgburugburu. 12 Ẹphe nọdu agu ebvu agushikpoo ya ike asuje:

“Nwaturu ono, e gburu
 g'ọ buri eja oha
 ono be o gbakwaru
 g'e mee g'ike tuko
 lwa iya l'eka;
 l'oo tuko iphemiphe
 nworu;
 tuko mmamiphe nweru;
 buri onye-ishi iphemiphe.

G'a kwabeje iya ubvu;
 jaje iya ajaja;
 gojeru onu-oma nu iya.”

13 Mu numa g'iphe, bukpo iphe, Chileke meru dobe l'imigwe; me ophu, o meru dobe l'eliphe; me ophu o meru dobe l'ime-ali; mekpoo iphe, o meru dobe leze-enyimu; tukuru agu ebvu asuje:

“G'iphe, bukpo onu-oma,
 aago agogo;
 me ubvu g'ubvu ha;
 me ajaja;
 me abu ishi k'iphemiphe
 tuko buri ke gube
 onye ono,
 no l'aba-eze ono waa
 gube Nwaturu ono
 jasu le tuutuutuu
 le mijimiimii.”

14 Iphe eno ono, nogbaa ndzu ono tuko su: “Oo g'ọ du.” Ndu bu ogerenya ukporo l'eno ono tuko daa kpurumu baaru onye ono, no l'aba-eze ono waa Nwaturu ono eja.

**Iphe-ohubama, e gude
nyachishia ekwo ono**

6 ¹Tobudu iya bu; mu huma ge Nwaturu ono nyafuru ke mbu l'iphe-ohubama esaa ono, e gude nyachishia ekwo ono. Mu bya anuma ge nanu l'ime iphe eno ono, nogbaa ndzu ono gude olu, daerupho g'egbigwe su: "Byakpodaapho-o!" ²Mu bya elee enya; mu huma inya, acha ucha. Onye no iya l'eli agba paru uta, eegudeje agba apfu. Onye ono be e kpu-beru okpu-eze l'ishi. O nodu l'inya ono; o buru iya eje ugu. O jeshia alwu ndu ohogu iya g'oolwujehawaa phe.

³Nwaturu ono byakwa anyakafu iphe-ohubama ono k'ebo bu iphe, e gude nyachishia ekwo ono. Mu numakwa ge k'ebo l'iphe eno ono, nogbaa ndzu ono suru: "Byakpodaapho-o!" ⁴Inya ozo lufutakwa. Ono nodu eke uswe-uswe. Onye no iya l'eli be e woru ugu-echi, ha njo ahaha pee. E zia ya g'o je emee g'unwu-eliphe tsoje ibe phe ugu; g'o mee g'unwu-eliphe wata egbushi onwophe; k'ophu eh udu guu ata adubaedu le mgboko.

⁵Nwaturu ono byakwa anyakafu iphe-ohubama ono k'eto. Mu numakwa ge k'eto l'iphe eno ono, nogbaa ndzu ono suru: "Byakpodaapho-o!" Mu bya elee enya huma inya, eji ke hirihiri. Onye no iya l'eli paru iphe, eegudeje atu erwa iphe. ⁶Mu numa iphe, du g'olu lechilabo iphe eno ono, nogbaa ndzu ono l'eka osuje: "Iphe e-rekwa ire shii; k'ophu nri, e gude aswa ozi ujiku ophu kpata buepho onye lanu be oo-ji epho kpeekpu. Nri, e gude aswa ozi ujiku lanu kpata bukwanuru umadzu eto be oo-ji epho kpurumu. O buepho g'e te emebyikwa manu yee mee emeyi."

⁷Nwaturu ono byakwa anyakafu iphe-ohubama ono k'eno; mu numakwa ge k'eno l'iphe eno ono, nogbaa ndzu ono asuje: "Byakpodaapho-o!" ⁸Mu bya elee enya huma inya, gbachishihuru agbachishihu. Onye no iya l'eli buru Anwuhu gedegede. Ali-maa nodu etso iya laz u. A bya ekee mgboko uzo eno; woru aka lanu ye phe l'eka; su g'ephe gude ugu-echi gbugbushia iphemiphe bu iya nu; g'ephe kpo-gbushia phe legu; gude ejo iphe-ememe mekpoo ejo anu-egbudu megbushia phe.

⁹O byakwa anyakafu iphe-ohubama ono ophu kwe iya ise. Mu bya ahuma oru-ngweja l'eka ono. Iphe, kuru le mkpula iya buerupho maa ndu ono, e gburu l'ike opfu l'ephe kwetar u iphe, ekwo-opfu Chileke pfuru ono; teme ephe shi anoduje eme egoshi l'ephe bu ndu ke Chileke. ¹⁰Ephe tuko g'ephe ha ara ora arashi iya ike su: "Nnajiuphu-e! Oo ngu bu onye du nsu; bya aburu ngu bu onye emeje iphe, g'i pfuru iya. ?Bu anyi no-beadaru ino-beagha temanu l'i kua ndu bu l'eliphe kpaa ishi iphe, meru anyi-a; gwaa phe ugu egbugbu-a, ephe gburu anyi-a?" ¹¹Tobudu iya bu; a bya ekeshikotaru phe awurukpata uwe, achagbaa nmalanmala l'ehu l'ehu. A su phe: "Unu noduro tutaro unme, unu atuta. Unu tafua nshi ngabefua nwanshii l'unu teke edzudu. Unu tutakpoepho unme ono jeye teke unu

e-dzu tẹmanu. Lọ kwa g'e gburu unubẹdua bu g'e gbujekwapho ikpoto ndu ozo l'eliphe; ndu bukwapho unwunna unu, ejeru Chileke ozi g'unubẹdua jeru iya ya-a.”

¹² Mu nọdu elekpọepho ẹnya teke o nyafuru iphe-ọhubama ono k'ishii. Noo ya; alị wata anma jijijiji anmashi iya ike; ẹnyanwu wata eji hiri-hiri g'uwe-aphu, e meru l'ẹjí eghu-ojii. Onwa l'ophu gbanwekọta keahaa meeme. ¹³ Kpokpode, du l'igwe dashihuaha l'alị g'ẹka oshi figu erishihu akpuru, akaduru akaka me oke pherephere nọdu ezi anma iya yiga yiga. ¹⁴ Igwe phuepho onwiya g'onye aphu utute phuta phufu; a humma-beru iya. Iphe, bukpoo ubvu, du lekameka; me alị, mini so-pheru mgburugburu bukotaru iphe, e wofuru l'eka ephe shi nodugbaa. ¹⁵ Tobudu iya bu; ndu eze ke ndiphe; me ndu oke amadu phe; me ndu-ishi ndu ojogu phe; me ndu nweru iphe; me ndu okpehu du; mekpoo onyemonye mgburugburu; ohu me amadu; tuko je edomikota onwophe l'ogba me le mgbaka mkpuma, nogbaa l'eka ubvu du. ¹⁶ Ephe tuko arakugbaa ubvu me mkpuma ono asuje: “Jiko daa dapyabe anyi g'ii-domia anyi g'onye ono, no l'aba-eze ono ta ahuma anyi; waa ge Nwaturu ono ta atu-koshi anyi oke-ehu-eghu iya. ¹⁷ Noo kele mboku ephe atukoshi ndiphe oke ehueghu phe be ruwakwaru nu. ?Denu onye suru iya akpafu l'iphu nta?”

**Igwerigwe ndu Izurelu, e meru
ohubama l'iphu**

7 ¹ E mecha; mu bya ahuma ojozi eno l'eka ephe pfuru le mgboko l'uzi aka igwe bechaaru; alị beru uzi eno. Ephe sede pherephere, eshije l'uzi aka ono ephen'eno g'o to zihẹ le mgboko. Pherephere zibuhu l'eliphe mgburugburu; ophu oozidu l'alị; ophu oozidu le mini; ophu o du-du g'o ka mma l'oo oshi lanu ezi pherephere. ² Mu humakwa ojozi-imigwe ozo, shi l'uzo ẹnyanwu awawa ephe abya. Ojozi k'ono be gude iphe, shi l'eka Chileke ono, no ndzu; mbu iphe eegudeje eme iphe-ohubama l'ehu. O bya araa ya arara rashia ya ike su unwu-ojozi-imigwe eno, Chileke ziru g'ephe je emebyishia alị; mebyishia mini; ³ su phe: “Unu ta adukwa iphe, unu e-mewaa mgboko; ozoo mini; ozoo oshi; g'anyi vuadaru uzo mee iphe, bu ndu ejeru Chileke anyi ozi iphe-ohubama l'egedegge onu-iphu.” ⁴ A koo umadzu ole, e meru iphe-ohubama Chileke ono mu numa; ephe du ukporo unu nemadzu iri lesato. Ndu ono shikota l'iphe, bu okpa-ipfu Izurelu l'ehu l'ehu. ⁵ Ndu e meru ohubama ono l'okpa-ipfu Jiuda du ukporo unu l'unu iri;

ndu e meru iya l'okpa-ipfu
Rube nu du
ukporo unu l'unu iri;
ndu e meru iya l'okpa-ipfu
Gadu du

- 6 Ndu e meru ohubama ono
 l'okpa-ipfu Asha du
 ukporo unu l'unu iri;
 ndu e meru iya l'okpa-ipfu
 Nafutali du
 ukporo unu l'unu iri;
 ndu e meru iya l'okpa-ipfu
 Manase du
 ukporo unu l'unu iri.
- 7 Ndu e meru ohubama
 ono l'okpa-ipfu
 Simiyonu du
 ukporo unu l'unu iri;
 ndu e meru iya l'okpa-ipfu
 Livayi du
 ukporo unu l'unu iri;
 ndu e meru iya l'okpa-ipfu
 Isaka du
 ukporo unu l'unu iri.
- 8 Ndu e meru ohubama ono
 l'okpa-ipfu Zebulun du
 ukporo unu l'unu iri;
 ndu e meru iya l'okpa-ipfu
 Jiosefu du
 ukporo unu l'unu iri;
 ndu e meru iya l'okpa-ipfu
 Benjaminu
 du ukporo unu l'unu iri.

Igwerigwe ndu ozo, bu aguta aguta

9 "E mechaa mu bya elee enya huma ikpoto ndu nmaru erupfu; k'opu bu lo to dudu nemazdu igbakoroshienyi suru g'ooguta phe logu. Ndu ono bu ndu shigbakpo o'ohamoha, du le mgboko; me ipfu g'ipfu ha le mgbo-ko-a; me mkpukpu le mkpukpu l'opu; me le ndu epfukota opfu-ali ndu du iche iche, no le mgboko-a. Epe tukoru g'ephe ha yekota akpawuru uwe, achagbaa nmalanmala. Epe toko g'ephe ha pfugbaaru l'atatiphu aba-eze ono; me l'iphu Nwaturu ono; bya apagbaaru igu leka. ¹⁰ Epe toko ara iya arara arashi iya ike asuje: Ndzota bukwa ke Chileke anyi, bu iya no l'aba-eze ono; bya abukwarupho ke Nwaturu ono." ¹¹ Ndu ojozi-imigwe g'ephe ha toko bya apfu-pee aba-eze ono; yee ndu bu ogerenya pho me iphe eno, nogbaa ndzu pho mgburugburu. Ndu ojozi-imigwe ono

g'èphe ha tũko daa kpurumu l'iphu aba-eze ono baaru Chileke eja; ¹²sũ: “Nokwa g'ò dũ bũ ono! G'agò ònu-òma mẽ ajaja mẽ mmamiphe mẽ ekele mẽ akwabè ùbvũ mẽ ike mẽ òkpehu buru kè Chileke anyi jasũ lè tuutuutu lè mĩmĩmĩmĩ! Nokwa g'ò dũ!”

¹³Tòbudu iya bũ; onye lanũ l'ime ndu bũ ògerenya ono bya ekua mu sũ mu: “?Ò dũ ngu g'ò bũ ndu ole bè ndu ono, e yeru awurukpata uwe, achagbaa nmalanmala ono bũ? ?Ò dũ ngu g'awe bè èphe shi?”

¹⁴Mu sũ iya: “Ònyibe; ò kwa ngu ka amama.” Ò sũ mu: “Ndu-a bukwa ndu ono, shi l'èjo oke iphe-èhuka ono fũta. Èphe gudewaa mee Nwaturu ngweja, shi l'èka Chileke saa awurukpata uwe phè ono; ò nõdu acha ùcha nno. ¹⁵Noo g'ò gude èphe nõdu l'iphu aba-eze Chileke ejeru iya ozi eswe l'enyashi l'ime eze-ùlo iya. Ò buru onye ono, nõ l'aba-eze ono bè anò-kubeje phè eche phè g'ò tò dũ iphe, e-me phè nũ. ¹⁶Ègu taa gũbaedu phè; òphu mini agũbaedu phè. Anwũ te echihèdu phè; òphu okpomòku adũdu phè. ¹⁷Noo lè Nwaturu ono, nõ l'echilabò aba-eze ono bè a-nòduepho eche phè g'onye eche atũru. Oo-dujeru phè je l'èka mini, anũje ndzũ futaru. Chileke a-tũko ènya-mini èkwa phè hushichaa phè.”

Iphe-òhubama k'èśaa, e gude nyachishia èkwo ono

8 ¹Tòbudu iya bũ; Nwaturu ono bya anyafũepho iphe-òhubama k'èśaa, e gude nyachishia èkwo ono; èkameka l'imigwe daèpho kè nyònyoronyo jasũ l'iphe, ha g'e kee awa lanũ èbo. ²No iya; mu bya ahũma ojozi-imigwe èśaa ono, apfũjeru l'iphu Chileke ono. A bya achìe phè opu-ògu èśaa.

³No iya; ojozi-imigwe òzo bya bya abata bya apfũru l'iphu òru-ngweja Chileke ono. Ò parũ ochi, a wũru lè mkpòla-ododo. A bya anũ iya ùnwù-isensu, ha shii g'ò gwakòbè ènwuru ùnwù-isensu ono l'epfupfu ono, ndu-nsò g'èphe ha anòduje epfu anũ Chileke ono; tũko gwee l'eli òru-ngweja mkpòla-ododo ono, nõ l'iphu aba-eze ono. ⁴Ènwuru òku ngweja ono kpũ-lihu yèe epfupfu, ndu-nsò epfũje anũ Chileke; shi l'èka ojozi ono pfũru akpũepho tũuu ala l'iphu Chileke. ⁵Noo ya bũ: ojozi ono mechaepho bya agũta òku l'òru-ngweja ono; gũ-jia ochi ono; bya eworu iya tũa kpoo l'eliphe. Mgboko swòkobe. Igwe nõdu ede edede bya agbè l'èka ono atũ egbigwe; ò nõdu ara òrà; ebemu-igwe nõdu alojeepho kè waa waa; alì nõdu anmakòta jiiijii.

Opu-ògu

⁶Tòbudu iya bũ; ojozi-imigwe èśaa ono, chì opu-ògu èśaa ono bya akwakòbè g'èphe bya awata egbu opu-ògu phè.

⁷Ojozi-imigwe kè mbũ bya egbua opu-ògu nkiya. Akamini mẽ òku, a gwakòberu mee nõdu edzeepho gè mini l'eliphe. Òku kèè eliphe èto

kepyashĩa uzi lanu; bya èkèé oshi, nò l'eliphe uzi èto kepyashìkwapho uzi lanu; bya atũko ẹswa oyi kepyashĩa.

⁸Ojozi-imigwe k'ẹbo bya egbua opu-ọgu nkiya. A paru iphe, du g'eze ubvu, ha shii, oku etsu phuruphuru paru chie l'ime eze-enyimu, dukota le mgboko l'ophu. Enyimu kee uzi eto; aka lanu bukotaruru mee. ⁹Iphe, bu iphe, no ndzu, bukota le mini kee uzi eto; uzi lanu nwushihukota. Ugbu mini kee uzi eto; uzi lanu mebyishihukota.

¹⁰Ojozi-imigwe k'eto bya egbua opu-ọgu nkiya; eze kpokpode shi l'imi-gwe bya adaa. O nodu eke jaajaajaa g'oku-apyipyi bya ekkee iphe, bukpo mini mgburugburu yele aka nggele nggele futaru; o kee ya uzi eto daa l'eka lanu. ¹¹Epha kpokpode ono buru "Age." Mini, no le mgboko kee eto; aka lanu soahaa ilu g'age. Ikpoto ndu ngutaruru mini ono, bu ndu no le mgboko nwushihu; o buru iphe, kparu iya nu bu le mini ono atso ilu.

¹²Ojozi-imigwe k'eno bya egbua opu-ọgu nkiya. E kee enyanwu uzi eto chia aka lanu iphe; bya ekkee onwa eto chia aka lanu iphe; bya ekkee kpokpode uzi eto chia aka lanu iphe; k'ophu oke lanu l'uzi eto l'iphoro phe gbaaharu ochii. Eswa kee eto; ophu iphoro adudu l'eka lanu. O bukwarupho nno bu g'o dafuru enyashi; mbu o kee eto; uzi lanu kabaa agba ochii.

¹³Mu bya elee enya huma ugo lanu l'eka oophe l'akpaminigwe. O nodu ara iya arara arashi iya ike asuje: "Nshio unwu-eliphe; nshio unwu-eliphe; nshio! Aphu atsoru ndu bu le mgboko me ojozi-imigwe eto-a, phoduru nu-a gbuẹpho opu-ọgu ophu epe abya egbugbu-a."

9 ¹Tobudu iya bu; ojozi-imigwe k'ise bya egbua opu-ọgu nkiya. Mu huma kpokpode, shihawaro l'igwe bya adaa l'ali. E woru ire-igodo, eegudeje tuhaa aka eeshije enyiba l'iduma, enwedu ohu woru nu iya. ²Kpokpode ono bya atuhaa aka eeshije enyiba l'iduma ono. Iduma ono wata akpu enwuru tututuutu g'eka a kpoberu oku icheku. Enwuru oku ono mee anwu me pherephere wata agba ochii. ³Noo ya bu; igube shi lenwuru-oku ono tsulihu tsuba l'eliphe. Igube ono be e yeru ike l'eka g'o gbaje g'akpi. ⁴A kakotaruru igube ono g'o to dukwa iphe, oo-me eswa, no l'eliphe; ophu o mebyikwa oshi; ophu o dukpoo iphe, futaru l'ali bvuru le mgboko; mbu iphe ekwo du, oo-mebyi; gbahaa ndu onu aphu bu ndiphe, e te emeduru iphe-ohubama Chileke legedegege onu-iphu. ⁵Igube ono be e ziru g'o nua ndiphe aphu onwa ise; ole o g'o to dukwa onye oo-gbu egbugbu. Obenu lejo mkpamehu, oo-kpa ndiphe be a-phue phe pho g'akpi aphuje onye o gbaru-a. ⁶L'ime onwa ise ono be ndiphe a-nodu achu anwu-hu achochu; epe taa humadu iya. Oo-gu phe anwuhu; obenu lonwu phehuwaru.

⁷Igube obu be a-nodu ele iya enya be oodugbajee pho g'inya, e doziru k'egude eje ọgu. Iphe, dugbaa ya l'ishi duchaa g'okpu-eze, e gude mkpola-ododo mee. Iphu phe dugbaa g'iphu nemadzu. ⁸Egbushi, no phe l'ishi

hachaepho ogologo ogologo g'egbushi unwanyi. Eze, nọ phẹ l'ọnu dọgbaa g'eze oduma. ⁹Ephe yeru iphe l'unme gude gbobuta obu phẹ g'uwe-igwè, ndu eje ọgu eyeje gude gbobuta ọkpoma. Igiji, ephe gude ñkù phẹ ede dọepho g'igiji igwerigwe ugbo-inya, e gude eje ọgu. ¹⁰Igube ono nwechakwaarù ùdè, ephe egudeje agba agbagba g'akpì. Èka ike dọ phẹ, bọ iya bọ ike ono, ephe e-gude nọ nemadzù aphù ọnwa ise ono bọru l'ùdè phẹ ono bẹ ọ kpakọru nọdu. ¹¹Onye eze phẹ bọru ojozi-imigwe ono; ophu bọ iya bẹ iduma, enwedù ọhu dọ l'èka. Epha ojozi ono l'opfu ndu Hiburu bọ Abadọnu; o be l'opfu Giriku; ọ bọru Apọliyonu.

¹²Tọbudu iya bọ; ejo iphe-ẹhuka kẹ mbù abvù. Ọ phọdukwaduro uzi ejo iphe-ẹhuka labọ.

¹³No iya; ojozi-imigwe k'ishii bya egbua opu-ọgu nkiya; mu nọma oluopfu, eepfu l'ọru-ngweja ono, e gude mkpọla-ododo mee ono. Opfu ono bẹ e pfuru l'ishishi mpu ọru-ngweja ono epheñeno l'ènya èka ono; a tọko nọmakota iya mgbo lanù. Ọru-ngweja ono bọerupho l'atatiphu Chileke bẹ ọ dọ gèdegede. ¹⁴Olu ono sù ojozi-imigwe k'ishii ono, bọ iya gude opu-ọgu ono: “Tọshichaa ojozi-imigwe ẹno ono, e keru egbu l'eze-ẹnyimu Yufurétisu ono.” ¹⁵No iya bọ; a parù ojozi ẹno ono wehakọta. Iphe, e meru phẹ dobedoru bọ g'ephe emee iphe ono, a sọru g'ephe mee ono; lẹ teke ono; lẹ mbọku ono; l'ọnwa ono; l'apha ono gèdegede. G'ephe kèè ndiphe uzi ẹto; tọko uzi lanù megbushikọta. ¹⁶A sù mu lẹ ndu ojọgu ndu ophu nọ l'eli ìnya bẹ dọ miliyonu ọkporo iri.^a ¹⁷No iya; mu hùma ndu agba ìnya ono l'ophulenyà ono; bya ahùma ìnya, ephe nọgbaa l'eli iya agba. Uwe-igwè, bọ uwe ọkpoma, ndu ono yeru l'ọkpoma nọdu ekegbaa uswe-uswe g'ọku; eke oyingo oyingo; bya ekekwapọ ododo ododo. Ishi dọgbaa ìnya phẹ ono g'ishi oduma. Ọku, enwu phoophoophoo; mẹ ẹnwuru-ọku; mẹ nshì-egbe shi phẹ l'ọnu afùshi. ¹⁸Ọ bọru ejo iphe-ememe ẹto ono bẹ e gude kèè ndiphe ẹto; gude ọku; yẹlẹ ẹnwuru-ọku; yẹlẹ ọku-nshì-egbe, shi phẹ l'ọnu woru uzi lanù gbushia. ¹⁹Èka ike dọ ìnya ono bọ l'ọnu phẹ mẹ l'ọdzu phẹ. Ọdzu phẹ ono dọgbaa g'agwọ bya enwegbaaru ishi. Ọ bọru ishi ono bẹ ephe egudeje emeka nemadzù iphe.

²⁰Ọphu izimanù alwaduru ndiphe azù; mbù nwa ndu ophu e gbuphodoru l'ejo iphe-ememe ono. Ọphu ephe a haduru ejo-iphe, ephe eme; ophu ephe ahaduru abarù ọbvù yẹe iphe, ephe pyìru apyìpyi eja; mbù iphe ono, ephe gude mkpọla-ododo ọzoo mkpọla-ọchaa wù; mẹ ophu ephe kpuru l'ope; mẹ ophu ephe pyìtaru lẹ mkpuma; mẹ ophu ephe pyìru l'oshi. Mbù iphe tọkoru bọru iphe, ta aphùdu ọzo; ophu ọ nọdu iphe lẹ nchì; ophu o jedu ije. ²¹Ọphu izimanù ejo-iphe ono alwaduru phẹ azù; ophu ephe ahaduru egbu ọchi; eme mgbashì; apharwùshi onwophe; waa ezi iphuru.

^a 9:16 Iphe, ọ bọ bẹ bọ “200,000,000” lẹ mbekee.

**Ojozi-imigwe yẹle nwẹkwo,
a phuru aphuphu**

10 ¹Tobudu iya bụ; mu hụma ojozi-imigwe lanụ, e yeru ike, ha shii l'ẹka g'o shi l'igwe alwazeta lẹ mgboko; urwukpu sọ-phae ya mgburugburu. Ẹko-mini gbaa ya l'ishi. Iphu nọdu egbu iya nwīnwii g'ẹnyanwu. Ọkpa iya ẹphenebo dughaa g'ọku, kpuru oronmono g'òbvrú. ²Iphe, o gude l'ẹka bụru nwẹkwo, e kpuharu ekpuha. O woru ọkpa ẹkutara zọbe l'eli eze-ẹnyimu bya eworu ọkpa ẹkicha zọbe l'eli-mgboko. ³Ọ bya echia mkpu chishia ya ike. Ọrà iya dọpho g'oduma suru ekiri. O chiẹpho mkpu ono egbigwe ẹsaa ono tọahaa gbaagbaa gude yeaharu iya ọnu. ⁴Mu nọdu emekwada gẹ mu dee iphe egbigwe ẹsaa ono pfuru; mu numa olu-opfu, shi l'imigwe sụ: “Iphe ono, egbigwe ẹsaa ono pfuru ono ta abukwa iphe, ii-je edede. Ọphu ọ dukwa onye ii-pfuru iphe ono, i numaru ono.”

⁵Ojozi ono, mu humaru ono, zọberu ọkpa lanụ l'eli eze-ẹnyimu bya azọbe nanụ l'eli-mgboko ono bya apalia ẹkutara iya eli; ⁶bya egude ẹpha Chileke, dzu ndzu ojejeje ono rifu angụ; mbụ onye ono, bụ iya meru igwe; mee iphe, dụ iya nụ; bya aburu iya meru eliphe yee iphe, dụ iya nụ; mee eze-ẹnyimu yee iphe, dukota iya nụ. Ọ bụru ẹpha Chileke ono bẹ o gude rifu angụ sụ l'o rwuwaru teke oo-me iphe, ọ tọberu. ⁷Lẹ teke ojozi k'ẹsaa gbuwaru opu-ọgu nkiya bẹ Chileke e-megbu iphe, o domiru edomi, bụ iya bụ g'o pfuru iya ndu shi ejeru iya ozi, bụ iya bụ ndu mpfuchiru iya.

⁸Olu-opfu ono, e shihawaa gbẹ l'imigwe gude pfuru yeru mu ono byakwa epfuru yeru mu ọzo sụ: “Je anata nwẹkwo ono, e kpuharu ekpuha ono, o gude l'ẹka mbụ ojozi ono, zọberu ọkpa lanụ l'eli eze-ẹnyimu; zọbe nanụ l'eli-mgboko ono.”

⁹Mu bya ejepfu ojozi ono je asụ iya g'ọ nụ mu nwẹkwo ono. Ọ sụ mu: “Nggẹ ya; taa. I -tachae ya phọ l'ọo-tsọ ngu ilu jeye l'akurepho. Ọle teke iita iya bẹ ọo-nodukwa atso ngu utso gẹ manụ-ẹnwu l'onu.”

¹⁰Mu bya anata ojozi-imigwe ono nwẹkwo ono woru taa. Mu nọdu ata iya; ọ nọdu atso mu gẹ manụ-ẹnwu l'onu. Mu tachaa ya; ọ tsọ mu ilu jeye l'akurepho. ¹¹No iya; ọ sụ mu: “Jekwa je apfuru l'edzudzu-ọha pfuchiaru Chileke ugbo lanufua; mbụ pfua iphe, Chileke shi domia edomi l'oo-me l'igwerigwe mkpukpu lẹ mkpukpu, nọ lẹ mgboko; mẹ ọhamoha; mẹ ndu shi l'iphe, bukpo l'opfu-alị ndu dụ iche iche, nọ lẹ mgboko-a; mẹ ndu eze.”

Umadzu labo, ara opfu Chileke arara

11 ¹Noo ya bụ; a bya eworu ọwa, eegudeje atụ iphe nụ mu bya asụ mu: “Gbeshi je atua eze-ulo Chileke; yee ime ẹka ono, e doberu ọrungeja Chileke ono; gwa ndu abaru Chileke eja l'ime eze-ulo iya ono ọgu.

²Ọlẹ ọ g'ì tì tùkwà ọma ẹka ono, nọ-pheru eze-ulo ono mgburugburu ono. Pakwaru ono haa; l'ono bẹ e dobekwaru ọha, ata amadu Chileke. Mkpukpu ono, du nso ono bẹ ọha ono e-gude okpa tee pyakapyaka ukporo onwa labo lonwa labo. ³Noo teke mu e-ye umadzu labo, a-nodu epfuchiru mu nu. Umadzu labo ono e-yechaa uwe-aphu. O buru ujiku ujiku unu eto l'ujiku ukporo eto bẹ ephe e-gude zikota ozi, Chileke ziru phe.”

⁴Umadzu labo ono bu upfu olivu labo ono me oroku ono, bvuru l'iphu Nnajiuphu, nwe mgboko ono. ⁵O -nweru onye jeru ge ya meka phe iphe; oku eshi phe lonu bya eworu onye ono yee ndu ephe l'iya achi ejo idzu lanu kegbushia; mbu ndu ono, buwaa ohogu phe ono. Mbu-a; iphe, bu onye jeru ge ya meka phe iphe bu egube ono bu gee-shi gbua ya. ⁶E yeru phe ike l'eka; k'opu ephe a-gu-chi akpaminigwe; k'opu igwe ta abyadu atada mini l'ali teke ono, ephe a-nodu epfuchiru Chileke ono. E yekwa phe pho ike l'eka g'ephe duje ike mee mini g'oo-buru mee; waa g'ephe tujekwapho ndiphe ejo iphe-ememe, dukpoo phe ree tekenteke, du phe ree.

⁷Teke ephe zibecharu ozi ono, Chileke ziru phe ono bẹ ejo anu-egbudu ono, e-shi l'iduma, enwedu ohu futa ono l'a-bya etsoo umadzu labo ono ogu. Loolwu-kpee phe woru phe gbushia. ⁸Odzu phe bẹ a-wushi l'echilabo eze mkpukpu ono, a kpopyaberu Nnajiuphu phe loswebe ono. Epha mkpukpu, e gude anma etu ehū mkpukpu ono bu Sodomu yele l'jiputu. ⁹Odzu umadzu ebo ono bẹ e te ekwekwa g'e lia elili. Ndu shi le mkpukpu le mkpukpu, du iche iche; me ipfu ipfu, du iche iche; me ndu shikota l'iphe, bukota opfu-ali ndu du iche iche, no le mgboko-a; me ndu shi l'ohamoha, nokpoonu l'a-wukotaru bya ahuma odzu phe. O buru g'aa-huma odzu phe bu ono ujiku eto le mkpirikpu iya. ¹⁰Ehu atuko atso ndu bu le mgboko l'opu utso; opfu le gburu umadzu ebo ono. Ephe abo ya g'aaboje iphe-a; nuchaa ibe phe iphe obo-iphe; kele umadzu labo ono, epfuchiru Chileke ono shi akpa ndu bu le mgboko ehū shii. ¹¹A noepho abali eto le mkpirikpu iya Chileke kuru unme-ndzu ye phe l'ehu; ephe teta nodu ndzu. Ndu rwuta iphe, bukpo ndu humaru phe nu. ¹²Tobudu iya bu; umadzu labo ono numa olu oku, e kushiru ike, shi l'imigwe su phe: “Unu bata lime eka-o.” Ndu ohogu phe ono kuru ele phe enya; ephe nodu l'urwukpu bahu l'imigwe. ¹³Ali wata anma oke jijijijii teke onokwapho. Mkpukpu ono kee uzi iri; eka lanu bukotaru mkpurupyata. Ndu ali ono, nmaru jijijijii ono gburu egbugbu du unu nemadzu iri l'esaa l'umadzu ukporo iri.^b Ndu rwuta ndu phoduru nu. Ephe wata aja Chileke imigwe ajaja.

¹⁴Ejo iphe-ehuka k'ebō bvū. Ọlẹ ọ g'unu lekwa le k'eto abyaakwaa.

Opu-ogu k'esaa

¹⁵Tobudu iya bu; ojozi-imigwe k'esaa bya egbu opu-ogu nkiya. Ikeropfu swoshihu l'imigwe asuje: “Nta bẹ ike k'ali-eze unwu eliphe

^b 11:13 Iphe, ọ bu bẹ bu “7,000” le mbekee.

l'oplu bụakwa kẹ Chileke anyi yẹ kẹ Kéreshi iya ono, bụ eze, o woru mgboko ye l'ẹka ono. O je l'aburu eze jasụ lẹ tuutuutu lẹ mịmimii." 16 Ndu bụ ọgerenya ụkporo l'eno ono, nọ l'aba-eze phẹ l'iphu Chileke ono daa kpurumu kpube iphu l'alị baarụ Chileke ẹja; 17 sụ:

“Anyi ekele ngu ekele
Nnajiuphu, bụ Chileke,
bụ Ọkalibe-Kakọta-Ike.
Onye bụ Chileke, nọ ndzụ
bya aburu onye shihawaa
nọduta tẹmanu
mgboko dụ.

Anyi ekele ngu l'i
goshihawaru ọha
l'eze ike ngu ono parụ ẹka
apa.

I goshiakwaruphọ nta-a
l'oo gubedua bụ onye-eze,
iphemiphe dụ l'ẹka.

18 Ẹhu wata egbu ọhamoha
eghu;
ị tukoshi phẹ
oke-ẹhu-eghu ngu.

Ọle o rwuakwanaru teke
ii-kpe ndu nwụhuru
anwụhu ikpe;
mẹ teke ii-bu ndu
mpfuchiru ngu obunggo;
mẹkpoo ndu-nso g'ẹphe
ha;
waa ndu akwabẹ ẹpha
ngu ùbvù;
onye upfu mẹ onye nta;
o rwuakwaaphọ teke
ii-mebyishi ndu ono,
emebyishi mgboko l'oplu
ono.”

19 Ọo ya bụ; a gụhaa eze-ulo Chileke ono, dụ l'imigwe ono. A hụ-
ma okpoko ọgbandzu ono, shi Chileke l'ẹka l'ime eze-ulo ono. Igwe
nọdu alọ ebemu kẹ waa waa; ọ nọdu ara ọrà; ede edede bya agbẹ
l'ẹka ono atụ egbigwe. Alị wata anma jiiijijii. Igwe nọdu atụ oke
akamini.

Nwanyị yẹe ẹjọ-oke-agiyi

12 ¹A nọnyaa; oke iphe-ọhubama wata ememe l'imigwe. Ọ ọ́rú nwanýi lanu, yeru ẹnyanwu g'onye yeru uwe. Ọ pfulu apfulu l'eli ọ́nwa. Ọ kpuru kpokpode iri l'ẹbo l'ishi g'onye kpu okpu-eze. ²Nwanýi ono bẹ ẹpho bewaru l'ezeda. Ime ọ́du eme iya emeshi iya ike k'anwu nwa ono. Ọ metabe iya k'ọ́phu ọ́ rashiaru ẹkwa.

³Iphe-ọhubama ozo wata ememe l'imigwe. Ọ buri ẹjọ-oke-agiyi, eke uswe-uswe bẹ futaru nu. Ọ nweru ishi ẹsaa; bya efua mpu iri bya ekpuchaaru okpu-eze l'ishi iya ono ẹphe n'ẹsaa. ⁴Ọ gude ọ́du iya kẹe kpokpode, nọ l'igwe ẹto chikoshia uzi lanu; ọ́ dashihu l'alì. Ọ bya apfulu nwanýi ono, abya ezeda ono l'iphu; g'ọ́o-buru: ezeda, oozeda; ya apata nwa iya taa. ⁵Ọ bya ezeda; mbu nwanýi ono; bya anwu nwa nwoke. Nwata ono bu iya bu onye e-mechaa gude mgborigwe buru eze ọ́hamoha l'ọ́phu. A bya ezichata nwata ono gude jepfu Chileke l'ẹka aba-eze iya nọ. ⁶Nwanýi ono gbala gbaba l'echiegu. Ẹka ono bẹ Chileke mematawaru iya ẹka oo-buru g'a ọ́du anu iya nri unu ujiku ẹto l'ujiku ukporo ẹto.

⁷Ọgu tsu l'imigwe! Mayikelu yẹe ojozi, etso iya l'azu wata etso ẹjọ-oke-agiyi ono ọ́gu. Ẹjọ-oke-agiyi ono yẹe ndu ojozi iya wota phe ọ́gu ono. ⁸Mayikelu phe lwu-kpee phe; kele ike ta adu-zidu phe. E mechaa; ọ́phu ọ́ duedu ẹka e kweru g'ẹphe ọ́du l'imigwe. ⁹A chifu ẹjọ-oke-agiyi ono l'imigwe. Ọ kwa-a ẹjọ-oke-agiyi ono bẹ bu agwo teke ndiche pho. Ọo ya bu onye ono bu Obutuswe bya aburu Nsetanu; mbu onye anoduje edephu unwu-eliphe l'ọ́phu. A chifu iya l'imigwe l'ẹka ono; chidata iya le mgbo-ko yẹe ndu ojozi iya g'ẹphe ha. ¹⁰Mu numa mkpu, eechi l'imigwe su: "Ọ nwakwaru nta-a. Chileke dzoakwaru anyi obu. Chileke goshiakwaru nta-a loo ya bẹ ikemike du l'ẹka. Leze ono, Chileke yeru ọ́ bya ono, bu iya bu Kereshi bẹ goshiakwaru ike iya nta. A chifuwaru onye mgbamu ono, shi anoduje edophe kwerikwerikweri l'iphu Chileke eswe l'enyashi onoya; epfulu iya k'unwunna anyi; l'onye pho meswekwaru; onye pho meswee. ¹¹Iphe, unwunna anyi phe gude lwu-kpee Nsetanu bu mee Nwaturu ono waa asasa ono, ẹphe apfuleru l'edzudzu-ọ́ha saa okpobe-opfu ke Chileke ono. Noo kele ẹphe miru enya le ndzu phe su: l'ọ́ -buru anwuhu; ẹphe anwuhu iya. ¹²Ọo ya bu; g'imigwe tee eswa; ge ndu bu iya nu tekwaapho eswa. Obenu le-a; nshiokwanu gube alì l'ọ́phu; nshio gube eze-enyimu; kele Obutuswe gudewaa ẹhu-eghu bapfuta unu; eshinu ọ́ mawaru lo to duedu ge ya anọ-beru."

¹³Ẹjọ-oke-agiyi ono humaepho l'e shiwa l'imigwe chifu iya chiru iya ye l'eliphe; ọ́ wata achì nta nwanýi pho, nwuru nwa nwoke pho. ¹⁴A bya eworu eze nkù ugo; nkù ẹbolechiko chie nwanýi ono g'o gude phedu nahu ẹjọ-oke-agiyi ono lashia echiegu ẹka o bu; je ebua ẹka ono g'a zu ya apha ẹto le mkpirikpu iya. Ọ́phu ọ́ duedu iphe, ẹjọ agwo ono jekwaduru

iya ememe. ¹⁵Tòbudu iya bụ; ejo agwọ ono wata agbọ mini l'ọnu; mini ono nọdu agba gborogborogboro g'eze nggele. O bụru iphe, oome bụ gẹ mini ono bụru utso pata nwanyị ono. ¹⁶Alị yeru nwanyị ono ẹka. Iphe, alị meru bụ l'ọ saru ọnu tuko mini ono, ejo-oke-agiyi ono gbọru ono mịkota. ¹⁷Èhu ghuaaha ejo-oke-agiyi ono eghu l'opfu èhu nwanyị ono. O tũgbua jeshia etso unwu nwanyị ono ndu ophu phoduru nù ọgu. Ndu ọbu, ooje etso ọgu ọbu bụ ndu obu phẹ dū l'iphe, Chileke sūru g'e meje; mẹ ndu pfuru pfushia ike l'okpobe-opfu ono, Jizosū meru a maru ono. ¹⁸Tòbudu iya bụ; eze ejo-oke-agiyi ono tũgbua je apfuru l'aguga eze-enyimu.

**Ejo anụ-egbudu labo:
nanu shi lẹ mini; ophuu shi l'alị**

13 ¹Tòbudu iya bụ mu bya ahuma ejo anụ-egbudu, shi leze-enyimu ono afuta. O fua mpu iri bya enweru ishi ẹsaa. O kpuru okpu-eze lẹ mpu iya ono l'èhu l'èhu ephe n'iri. Lishi iya ono g'ọ ha bẹ e dekotakpoe-rupho epha, epfubyishigbaa Chileke epfubyishi. ²Ejo anụ-egbudu ono, mu humaru ono dūepho g'agu. Okpa iya dūgbaa g'okpa ejo nwanu biye. Onu iya dūgbaa g'onu oduma. Ejo-oke-agiyi pho bya eworu ike, shi buri nkiya ye iya l'eka; bya eworu aba-eze iya nu iya su iya g'o megbujekpoo g'ọ dū iya. ³Ishi ejo anụ-egbudu ono nanu bẹ ichii ọnyá, e gburu iya ya bẹ teke e gburu iya ya bẹ o gogo nwuhukwa. O lẹ ọnyá ono kphuwaru. Ejo anụ-egbudu ono dū-dzuru ndiphe mgburugburu biribiri. Ndiphe l'ophu wata iya etso-tso. ⁴Ephe wata abaru ejo-oke-agiyi ono eja; kele o yewaru ejo anụ-egbudu pho ike iya l'eka. Ephe nodu abakwarupho ejo anụ-egbudu ono eja su: “?Bụ onye dūbaa g'ejo anu-a? ?Bụ onye sūru g'oo-kpafu iya l'iphu k'ogu?”

⁵A paru ejo anụ-egbudu ono haa g'o pfugbaa g'onu ha iya. O nodu aja-kposhi onwiya gude nno epfubyishi Chileke. A hakwaaru iya pho ọzo g'o megbukpoo g'ọ dū iya l'ime ukporo onwa labo l'onwa labo. ⁶O saa onu wata epfubyishi Chileke; epfubyishi epha iya; mẹ ẹka Chileke ono bu; mekpoo ndu ophu bu l'imigwe. ⁷Chileke haa ya g'o tsoje ndu-nsọ ono ọgu; lwu-kpeje phẹ. A nodu ahaje iya g'o mee g'ọ dū iya l'èhu ndiphe; mbu iphe, bu ipfu ipfu l'ophu; mẹ mkpukpu lẹ mkpukpu l'ophu; mẹ lẹ ndu shikota l'iphe, bukota opfu-alị, dū l'iche l'iche, nọ lẹ mgboko-a; mekpoo iphe, bu ohamoha, nọ lẹ mgboko-a; o nodu emejgbaa phẹ; ephe eme iphe, o sūru g'ephe mee. ⁸Iphe, bukpo nemadzū, bu l'eliphe mgburugburu a-nodu abakotaru iya eja. Mbū l'ọ kwa ndu e te deduru epha phẹ l'ekwo ono, e shi teke a tūru okpa mgboko deshita epha ndu a-nodu ndzū ojejoje ono; bẹ bụ ndu a-nodu abaru iya eja ono.

⁹G'onye nweru nchị ngabekwa iya. ¹⁰O kwa onyemonye, aa-kpu lẹ ndzū bẹ a-kpu lẹ ndzū. Onye ee-gbu lẹ mma bẹ e gbufutajekwa lẹ mma. O kwa iya bụ lẹ ndu-nsọ gbaru g'ephe buri ndu a-ta nshi nodu Chileke l'eka noshia ya ike.

¹¹Mu bya ahuma ejo anu-egbudu ozo, bu l'ali be o shi emifuta. Yebu-
dua furu unwu-mpu labo, dugbaa ge mpu nwa aturu; opfu, oopfu l'onu
du ge k'ejo-oke-agiyi. ¹²O bya egude ike ejo anu ke mbu pho meahaa
iphe, bukpo iphe, du iya ree ememe l'ataphu ejo anu-egbudu ke mbu
onoya. O bya emee: ndiphe wata abaru ejo anu-egbudu ke mbu pho eja;
mbu anu k'ono, onya e shi gbu ya l'ishi, bu onya, gege gbu iya nu teke e
gburu iya ya kpohuwaru-a. ¹³Ejo anu-egbudu k'ebo-a nodu emeshiepho
oke iphe-ohumalenyá. O nodu emejehaa mee oku l'ooshi l'igwe bya adaa
l'ali l'iphu ndiphe. ¹⁴O gude oke iphe-ohumalenyá ono, a haru iya g'o me-
je l'ataphu ejo anu-egbudu ke mbu ono; dughua iphe, bukota nemadzu,
bu le mgboko. O su ndiphe g'ephe kpu nteke, dughu g'ejo anu-egbu-
du mbu ono; bageru iya eja; mbu nteke du g'ejo anu ono, e gburu onya;
ophu o nwuhuduru onoya-a. ¹⁵E kwechaa su g'ejo anu-egbudu ono k'ebo
kuru unme ye le nteke ono, a kuru: o du g'ejo anu-egbudu ke mbu
pho g'o dzuru ndu dujehaa ike pfua opfu; loomee g'e gbushia ndu te
ekwedu abaru yebu nteke ono, a kuru: o du g'ejo anu ono eja. ¹⁶Ejo
anu-egbudu k'ebo ono kebuta onyemonye; onye upfu me onye nta; onye
ukpa me oke amadu; ohu me amadu; kebuta phe; a gbashia phe ngga ohu-
bama l'ekutara; ozo l'egedegee onu-iphu; ¹⁷k'ophu o to dudu onye azu
aswa; ophu o dudu onye ere aswa erere; gbahaa l'o gbaru ngga ohubama
k'ejo anu-egbudu ono. Ngga obu, aagbaje obu bu epha ejo anu-egbudu
obu; ozo ogu, no onodu epha iya.

¹⁸Ono buru iphe, gbaru ge nemadzu goshi le ya nweru mmamiphe.
G'onye nweru uche je arja ogu epha ejo anu ono ariri jasu teke oo-maru
iphe, ogu obu bu; kele ogu ono bukwapho epha nemadzu. Ogu obu be bu
"666", bu iya bu unu l'ukporo iri leto l'ishii.

Ebvú, ndu a gbataru agu

14 ¹Mu bya elee enya; mu huma Nwaturu ono g'o pfuru l'ubvu Zayo-
nu. Ndu pfu-kube iya nu l'eka ono du ukporo unu nemadzu mgbo
iri lesato, bu ndu e deru epha Nwaturu ono yee epha Nna iya l'egedegee
onu-iphu. ²Mu bya anuma olu-opfu, a no limigwe pfua. Opfu ono nodu
adaepho g'eka eze mini aphu gbudugbudu; teme o nodu adahukwapho
g'eka igwe ede edede atu ebigwe. Mu byakwapho anuma oda ogumogu
ndu akpoje ogumogu akpo. ³Ikpoto ndu ono, pfuru l'iphu aba-eze ono me
l'iphu iphe eno ono, nogbaa ndu ono; me l'iphu ndu bu ogerenya ono;
nodu agu ebvu ophuu. Ophu o dudu onye suru anwuta ebvu ono gbahae-
pho ukporo unu nemadzu iri lesato ono, bu ndu a gbataru l'eliphe ono.
⁴Ndu ono bu ndu te emerwujeduru onwophe l'ehu unwanyi. Ndu doberu
eka doo ge nwamgboko, nwoke teke engeswee okpa. Ephe bu ndu ono,
buepho Nwaturu ono be ephe awujeru etso eje ekameka, ooje ono. Ndu a
gbataru l'eka ndiphe no; ephe buru akuru iphe-mbu a nuru Chileke yee

Nwaturu ono. ⁵Ephe bu ndu teke adu-swee onye a-su l'ephe dzujeru uka. Ophu o dudu iphe uta, du phe l'ehu.

Ojozi-imigwe eto

⁶Mu huma ojozi-imigwe ozo, epheru ephekerephe ephekerephe l'akpa-minigwe. O buru iphe, e ziru iya bu g'o je ezia ndiphe mgburugburu ozi-oma ojejeje ono; g'o je ezia ya ohamoha, nokpoo le mgboko; me ipfu l'ipfu g'ipfu ha; me le ndu shikota l'iphe, bukota opfu-ali ndu du iche l'iche, no le mgboko-a; me iphe, bukpo mkpukpu, nokpo le mgboko. ⁷O nodu ara iya arara asuje: "Unu tsujekwa Chileke ebvu. Unu kwabejekwa iya ubvu; le teke oo-kpe ikpe rruakwaru. Unu bajekwaru Chileke eja; l'o kwa iya meru igwe bya emee ali; bya aburu iya meru eze-enyimu; meko-ta iphe, bukotakpoo aka mini futaru."

⁸Ojozi-imigwe ozo, bu k'ebu nodu ephe etso ke mbu pho l'azu epfu su: "Ike buakwaru Babilonu! Ike buakwaru Babilonu! Mkpukpu ono, a maru epha iya ono, bu Babilonu be ike buakwaru nta. Mbu mkpukpu onoya, cheru ohamoha mee ya ono, bu iya bu oke-ehu-eghu ke Chileke ophu Chileke a-tu-koshi iya; opfu l'opharwushi onwiya."

⁹Ojozi-imigwe ozo, bu k'eto pheru tsoru phe. O nodu arakwa iya pho arashi iya ike asuje: "Onye abaru ejo anu-egbudu ono eja; bya abaru nteke, a kpuru o du g'o du; onye kweru g'o gbaa ya ngga ohubama l'egedegee onu-iphu; ozoo l'eka; ¹⁰onye ono be a-ngukwa oke-ehu-eghu Chileke ge mee, aagwaduru mini. Ee-gude oku, enwu phuruphuru yee nshi-egbe nua onye ono aphu l'iphu unwu-ojozi-imigwe, du nsu; waa l'iphu Nwaturu ono. ¹¹Oku ono, ee-gude nua phe aphu ono be enwuru iya a-noduepho akpu tututuutu ala l'imeli jasu le tututuutu le mii-mii. Ndu ono be a ta abyakpoda aha g'ephe uta unme me teke lanu; eswe l'enyashi; mbu ndu ono, l'abajeru ejo anu-egbudu ono eja; bya abakwaru iya pho nteke, a kpuru o du g'o du onoya; me iphe, bukpo onye kweru: a gbaa ya ngga ohubama, egoshi epha ejo anu-egbudu onoya."

¹²O kwa iya bu ota-nshi ke ndu-nsu; ndu anoduje eme iphe, Chileke pfuru; ndu no Jizosu l'eka.

¹³Mu numa olu-opfu, a no l'imigwe pfua su mu: "Dee iphe-a l'ekwo. Ehu-utso be a goru nu ndu a-nwuhu shita nta-a kwaseru; mbu ndu a-nwuhu l'oo l'ephe woru onwophe ye Nnajiuphu l'eka."

Unme Chileke nalita iya su: "Oo ya-o! Oo g'o du bu ono. Ehu a-tso phe utso eviya; noo l'ozu, ephe jeru be ephe jefuwaru l'ishi; atutawa unme; e jekwanu l'ebu phe obunggo ozi ono, ephe jeru onoya."

Aakpata ndiphe g'iphe, e meberu l'opfu

¹⁴Mu bya elee enya huma urwukpu ocha. Mu huma onye no anoo l'urwukpu ono. Onye ono, no iya nu ono dupeho ge nwa ndiphe. O kpuru

okpu-eze, e gude mkpola-ododo wua; o pakwaru pho mma, atsu nkọ l'eka. ¹⁵Ojozi-imigwe ozo, shi l'eze-ulo Chileke lufuta bya araku onye ono, no l'eli urwukpu ochaa ono su iya: "Gude mma ngu ono kpatachaa iphe, e meberu l'ali lo gbawaru l'akpakpa iya. Noo l'iphe, e meberu le mgboko kachawaru akaka gbawaa g'aakpata iya." ¹⁶Tobudu iya bu; onye ono, no l'eli urwukpu ono bya ewota mma iya gbua ke chaphukumu l'eliphe; shi nno kpata ndiphe g'aakpaje iphe, e meberu l'ali-a.

¹⁷O nwekwarupho ojozi-imigwe ozo, shikwapho l'eze-ulo Chileke l'imigwe lufuta. Yebedua gudekwapho mma, atsu nkọ.

¹⁸Ojozi-imigwe ozo shi l'ime aka ono, oru-ngweja Chileke no ono lufuta. Yebedua be oku enwu phoophoophoo du l'eka. O kua onye k'ono, gude mma, l'atsu nkọ ono oku; kushia ya ike su: "Gude mma ngu, l'atsu nkọ yebutachaa mebyi vayinu, du l'opfu-vayinu, tukoru mgboko dzuru; kele mebyi iya kachawaru akaka!" ¹⁹Tobudu iya bu; ojozi-imigwe ono woru mma iya dabẹ l'eliphe bya atukokpoepho mebyi vayinu no iya nu gbubutachaa bya achiru iya ye l'eze aka, aazoshije mee l'akpuru vayinu, bu iya bu oke-ehu-eghu Chileke. ²⁰A bya azoshia mee l'akpuru vayinu ono l'eka aazoshije iya lazụ mkpukpu. Mee ono buru mee nemadzu. Mee ono nodu aso gborogboro ge ngele l'eka ono. O soo so-rwua aka ogologo iya ha gukporo manyiru iri. Teme o byakwapho utso, du-tabe ogbu; k'ophu onodu akpa inya lonu me inya rwuba iya.

**Ojozi-imigwe, gudegbaa ejo
iphe-ememe k'ikpazu**

15 ¹Mu bya ahuma oke iphe-ohubama, du biribiri ozo, eme l'imigwe. O buru ojozi-imigwe esaa be gude ejo iphe-ememe esaa. O buru iya bu ejo iphe-ehuka esaa k'ikpazu, bu oke-ehu-eghu Chileke a-tukoshi unwu-eliphe. Teke iphe-ehuka ono buverupho ephe n'esaa; oke-ehu-eghu Chileke abvu.

²Mu humakwapho iphe, du g'eze-enyimu, aphu ngerengere g'e woru onyo yee oku, enwu enwunwu gwakobe iya. Mu humakwapho ndu lwukperu ejo anu-egbudu pho yee ntekpe, a kpuru o du go du pho. Ndu ono bukwapho ndu jikaru lephe te ewoduru ubvu akwabe ogu ono, no-chiru enya epha ejo anu ono. Ephe pfuru pfu-kube eze-enyimu ono, du g'onyo ono. Ephe pagbaaru eze une, Chileke nuru phe. ³Ephe nodu agu ebvu Mosisu ono, bu nwozi Chileke; mbu ebvu, bukwapho ebvu Nwaturu ono su:

"Gube Chileke; oo ngu bu
Okalibe-Kakota-Ike.

Iphemiphe, i mekotaru paru
eka bya adukwapho
biribiri.

Oo ngu bụ eze l'ọhamoha.
 Ụzo ngu pfugbaaru
 nhamunha bya
 abugbaaru ọkpobe ụzo.
 4 Nnajiuphu; ?bukpoo onye
 bụ onye a-sụ
 lẹ ya taa tsudu ngu ebvu;
 ọphu ya taa akwabedu
 ẹpha ngu ùbvù?
 Ọ kwa ngu kpurumu bụ
 onye dū nsọ.
 Ọhamoha a-bya abaarū
 ngu eja.
 Noo kele onyemonye
 huma-dzuwaru
 iphemiphe, iime,
 pfuru ọto.”

⁵E mechaa; mu bya elee ọnya ọzo. No iya; mu huma eze-ulo Chileke l'imigwe g'a gūharu ime iya agūha. Mbụ ime ẹka ono, ụlo ono, e gude ẹkwa mee bụ Chileke bẹ o shi l'ẹka ono nọ; mbụ ụlo ẹkwo ono, nọ-chiru ọnya ọgbandzu, shi Chileke l'ẹka ono. ⁶Ojozi-imigwe ẹsaa ono, bụ pẹ gude uzi ejo iphe-ememe ẹsaa ono shi l'ime eze-ulo Chileke ono lufuta. Ẹpẹ yegbaa uwe, bụ asagū-mini; egbu kẹ nwīnwii. Ẹpẹ gude akpọ, e gude mkpọla-ododo mee; gude kebuta iya l'ọkpoma. ⁷No iya; onye lanụ l'ime iphe ẹno ono, nọgbaa ndzụ ono gbeshi bya eworu ochi ẹsaa, a wūru lẹ mkpọla-ododo; woru nūgbaa ojozi ẹsaa ono. Iphe, jiru ochi ẹsaa ono ejiji bụru oke-ẹhu-eghu Chileke; mbụ Chileke ono, nọ ndzụ ojejoje. ⁸Ẹnwuru ọkụ kposihūepho ji ụlo ono pyimu; kele eze-odu-biribiri Chileke mẹ ike iya bẹ dū l'ẹka ono. Ọphu ọ dūdu onye dūru ike bahū l'ime ụlo ono jasū teke ejo iphe-ememe ẹsaa ono, ojozi-imigwe ẹsaa gude ono bvuadaru.

Ochi, e yejiru oke-ẹhu-eghu Chileke eyeji

16 ¹Tọbudu iya bụ; mu nūma olu-opfu, e shi l'ime eze-ulo Chileke ono chia g'e chiru mkpu sū ojozi ẹsaa ono: “Unu je eworu ejo iphe-ẹhuka ono, shi l'oke-ẹhu-eghu Chileke ono wushikota lẹ mgboko l'ophu; mbụ ejo iphe-ẹhuka ono, dū l'ochi ẹsaa ono.”

²Ojozi-imigwe kẹ mbụ bya atugbua je awushia ejo iphe-ẹhuka ọphu nọ l'ochi nkiya lẹ mgboko. Onwo, aba yoyoyo bya eme ejo ẹhuka; wata abagbaa iphe, bụ ndu ono, a gbaru ngga ọhubama k'ejo anụ-egbudu ono; waa l'ẹhu iphe, bụ ndu ono, shi abarū ntẹkpe ono, a kpuru ọ dū g'ejo anụ-egbudu ono eja.

³Ojozi-imigwe k'èbo bya atugbua je awuru ejo iphe-ehuka ophu no l'ochi nkiya ye l'ime eze-enyimu. Mini, no leze-enyimu ghoo mee; duopho ge mee onye nwuhuru anwuhu. Iphe, bukpo iphe, dzu ndzu, bu l'ime mini nwushihukota.

⁴Ojozi-imigwe k'eto bya atugbua je awuru ejo iphe-ehuka ophu no l'ochi nkiya ye le nggele waa l'ime iphe, bu aka mini futakporu go ha. Mini bukotaruu mee. ⁵Mu numa aka ojozi-imigwe, bu iya eche iphe, bu mini nche suru: "Gube Nnajiuphu pfubekwaru aka oto; mbu gube onye ono, no ndzu; bya aburu onye ono, shihawaa noduta ono. Ikpe-a, i nmaru ndiphe-a be goshiru li bu onye ekpeje ikpe nhamunha. ⁶Le ndiphe ono, bu phe gbushiru ndu-nso bya egbushia ndu mpfuchiru ngu l'echilabo phe ono; mbu gbushia phe ghakaa mee phe ono be i cheakwarupho mee; ephe nga. Iphe ono, i meru ndiphe ono buru iphe, gbaru phe nu bu onoya." ⁷No iya; mu numa olu-opfu, a no l'oru-ngweja Chileke epfu; mbu aka aakpoje unwu-isensu oku l'imigwe. Olu ono nodu asuje: "Nokwa go du-o! Nnajiuphu, bu Chileke; oo gubedua bu Okalibe-Kakota-Ike-o. Ikpe, i kperu be buopho okpobe ikpe bya abukwarupho ikpe, pfuru nhamunha."

⁸Tobudu iya bu; ojozi-imigwe k'eno bya atugbua je eworu ejo iphe-ehuka ophu no l'ochi nkiya kpua l'enyanywu. E mee enyanwu; okpomoku iya wata erebushi nemadzu anu k'ophu oomeje nemadzu loo du g'iphe, a huberu l'oku. ⁹Ejo okpomoku ono wata erebushi ndiphe anu. Ephe wata epfubyishi epha Chileke; mbu yebedua, kweru gegube ejo iphe-ehuka ono byapfuta phe. Ophu izimanu alwaduru phe azu ke gephe wata iya akwabè ubvu.

¹⁰Ojozi-imigwe k'ise bya atugbua bya eje eworu ejo iphe-ehuka, no l'ochi nkiya kpua l'aba-eze ejo anu-egbudu pho. Ochii buru kpukumu bya agbachikota iphe, bukpo ndu kweru g'ejo anu-egbudu ono buru eze phe. Ndiphe wata ata kpoopookpo k'ejo iphe-ehuka ono, paru aka ephe eje ono. ¹¹Ephe wata epfubyishi Chileke k'imigwe k'iphe ono, aphugbaa phe uphu me onwo ono, aba phe nu ono. Ophu izimanu iphe, ephe eme alwakwaru phe pho azu.

¹²Ojozi-imigwe k'ishii je eworu ejo iphe-ehuka, no l'ochi nkiya wuru ye l'oke-enyimu Yufuretisu. Mini iya tashihu; k'ophu bu le gbororo a-dabyiru iya ge ndu eze, shi l'uzo enyanwu awawa aghajaje iya. ¹³Mu bya ahuma obvu eto, dugbaa g'ewo gephe afutagbaa. Nanu shi lonu ejo-oke-agiyi ono afuta; nanu shi lonu ejo anu-egbudu pho afuta; nanu shikwapho lonu onye mpfuchiru ono, l'epfujie iphe, Chileke epfuduru ono. ¹⁴Ephe bugbaa obvu, shikota l'eka Nsetanu; emegbaa iphe-ohumalenya. Ephe jepfugbaa ndu eze ndiphe mgburugburu je achikobe phe dzua ogo l'eka lanu kwaberu moku ono, Okalibe-Kakota-Ike, bu Chileke a-bya egoshi ndiphe onye ya bu ono.

¹⁵"Unu lekwa lo kwa g'abyabya onye-oshi atuje nemadzu l'uzorehu-a bu ge mu a-tu unu l'uzorehu. Ehu-utso be a goru nu onye ono, nwu enya

bya eletakwaphọ uwe iya ẹnya; k'ọphu onye ọbu taa gbaduru ọto ejephe mbọku onoya; iphere adu iya.”

¹⁶No iya; ọbvụ ẹto ono, shi l'ẹka Nsetanu ono bya emee ndu eze kẹ mgboko-a l'ọphu: ẹphe bya akpakọo l'ẹka lanu ọbu, eekuje Amagedonu l'opfu Hiburu.

¹⁷Ọo ya bu; ojozi-imigwe k'ẹsaa je ephekaa ẹjo iphe-ẹhuka ọphu nọ l'ochi nkiya lẹ phẹphere. O nweru olu, shi l'aba-eze, nọ l'ime eze-ulo Chileke ono chia mkpu sụ: “E mewaru iya!” ¹⁸Ebemu-igwe wata alọ waa waa. Igwe wata ede edede; wata ara ọrà; bya atụhaaa egbigwe. Alì-ọnma-jijijiji ẹgube iya ọphu eteke anmaswee; eshinu nemadzu fataru mgboko wata anmanma; mbu l'alì-ọnma-jijijiji ọbu pakpọoru ẹka apaa. ¹⁹Mkpukpu ono, a maru ẹpha iya ono, bu Babilonu bukaha onwiya uzi ẹto. Iphe, bukpo mkpukpu ozo, dukota lẹ mgboko dakashihukota buru ọla-l'iswi. Ebe Chileke azohakwaru mkpukpu ono, a maru ẹpha iya ono, bu Babilonu; yẹ ẹjo-iphe, ọ nọ megbabe. Chileke mee mkpukpu ono: ọ ngua mee l'eze okoro, e yejiru oke-ẹhu-eghu kẹ yẹbe Chileke eyeji, bu iya bu ikpe ọ nmaru iya. ²⁰Iphe, bukotakpo alì, bu alì, mini nọ-pheru mishihukota. Ọphu ọ duedu onye humabaaru ubvu. ²¹Eze akamini-mkpuma, l'anyigbaa kẹ tudu gẹ mkpuma-uswe shigbaa l'igwe aada l'alì; adagbushi unwu-eliphe. Ndiphe wata epfubyishi Chileke; kẹle akamini-mkpuma ono anu phe aphu. Noo l'ẹjo iphe-ememe, akamini ono wotaru phe ka g'aa-atu onu iya.

Eze-nwanyi ovuoba ono, bu Babilonu

17 ¹Ojozi lanu l'ime ojozi-imigwe ẹsaa ono, shi gude ochi oke iphe-ẹhuka ẹsaa ono byapfuta mu; bya asu mu: “Bya gẹ mu je egoshi ngu g'ee-gude woru ikpe nmaa eze-nwanyi ovuoba ono, nmagaru l'ẹka nggele du igwerigwe ono. ²Lẹ ndu eze kẹ mgboko-a bẹ ẹphe l'iya riakwaru ogori. Ẹphe l'iphe, bu ndu bu l'eliphe l'ọphu nguwaa mee phaa onwophe kutukutu.”

³Tobudu iya bu; Unme Chileke byakwa bya eji mu ẹhu pyimu. Ojozi-imigwe ono bya eduta mu jeshia l'echiegu. Noo ẹka mu nọ huma nwanyi, nọ l'eli ẹjo anu-egbudu, eke uswe-uswe. E dekania ẹjo anu-egbudu ono ẹpha, epfubyishi Chileke l'ẹhu iya mgburugburu. Ejo anu-egbudu ono nweru ishi ẹsaa bya enweru mpu iri. ⁴Iphe, nwanyi ono gude kwaa onwiya akwa buru uwe kpowula-kpowula, eke uswe-uswe. Iphe ozo, o gude memachaa onwiya emema bu iphe, e meru lẹ mkpola-ododo. O gbachaa-aru echi, ere ire l'ẹka bya edoo onwiya igopoto, aswa du l'olu. Iphe, ọ pa l'ẹka buru okoro, a wuru lẹ mkpola-ododo. Iphe, jiru okoro ono buru ẹjo akpamara mẹ ẹbyi ẹbyi, shi l'apharwushi, nwanyi ono pharwushiru onwiya. ⁵A bya edee ya ẹpha iya l'egedegee onu-iphu iya. Iphe, e domiru edomi e deru iya bu: “Babilonu ono, a maru ẹpha iya; mbu ne iphe, bukota ndu agba ukpara mẹ iphe, bukota ndu eme ahuma lẹ mgboko.” ⁶Mu

bya ahuma ge nwanji ono ngwaru mee ndu-nso; o nodu atsụ iya atsụ-tsu; waa mee ndu e gburu l'ike l'opfu ehu Jizosu.

Mu huma iya; o kwatakpo tufu mu ehu g'iphe atufuje ehu. ⁷Ojozi-imigwe ono su mu: “?Bu gunu be o gude o tufu ngu ehu? Ge mu byanu akaru ngu iphe, du le nwanji ono, bu iphe, e domiru edomi; mekpoo k'ejo anu-egbudu ono, nweru ishi esaa ono waa mpu iri ono, bu iya pa iya ono. ⁸Anu-egbudu ono, i humaru ono dukwaru teke o shi nodu ndu; obenu le nta-a be o to noedu ndu. O phoduakwaru-a nwanshi nta-a l'o shi l'iduma, enwedu ohu ono futa bya alaru onwiya l'iswi. Ndu ono, bu l'eliphe ono, bu iya bu ndu ophu e shikpo teke Chileke meru mgboko; ophu e deduru epha phe lekwo, e deshuru epha ndu a-no ndu ojejeje; iphe, bu ndu ono be oo-tufukpo ehu m'ephe -humaephe ejo anu-egbudu ono; kele o shi nodu ndu; ophu o dzuedu ndu nta; ole oo-mechakwaa nodu ndu ozo.

⁹“Ono buru iphe, gbaru ge nemadzu goshi le ya nweru uche bya arije iphe ariri g'o doo ya enya. Su-a; ishi esaa ono no-chiru enya ubvu ubvu esaa, nwanji ono no ano l'eli iya. Iphe ozo, o no-chifuaru enya iya bu ndu eze esaa. ¹⁰O dukwarupho ndu eze esaa, no nu. Umadzu ise l'ime ndu eze esaa ono ta anekwa. Onye lanu be nokwadu nu; onye lanu teke afutadu. O -futaepho; l'a haa ya l'o kpo upfu nwanshi. ¹¹A bya le k'ejo anu-egbudu ono, shi nodu ndu; ophu o noedu iya ono; yebdua bu onye eze kesato; ole yee ndu eze esaa ophu be nokwa l'oshi lanu; o je emechaa laa l'iswi.

¹²“Teme mpu iri ono, i humaru ono bu ndu eze iri; ophu e teke adudu ali-eze, a nuwaru phe. Ole a hakwanuru phe g'ephe nodu leka anu-egbudu ono buru eze awa lanu kpoloko kpekpu. ¹³Ndu eze ono be obu phe abukotajeru nanu. Ephe eworu ike phe me abubu ono, ephe bu eze ye ejo anu-egbudu ono leka. ¹⁴Ephe a-tuko g'ephe ha swikoo ike phe nanu; tsoo Nwaturu Chileke ono ugu. Ole Nwaturu ono l'a-lwu-gbulekwa phe-a. Noo kele oo ya bu Nnajiuphu, kakota ndu bu nnajiuphu; bya abukwarupho Eze, kakota iphe bu ndu eze. Iphe, bu ndu Chileke kuru bya ahota ono; teme ephe pfushia ike ono l'a-lwu-gbukwa phe pho.”

¹⁵No iya; ojozi-imigwe ono su mu: “?I humaru mini ono, nwanji ovuba ono no ano ono; mini ono be bu iphe, bukpo mkpukpu le mkpukpu; me ikpoto oha me ohamoha me ndu shi l'iphe, bukota opfu-ali ndu du iche l'iche, no le mgboko-a. ¹⁶Ejo anu-egbudu ono yee mpu iri ono, i humaru ono be bu ndu nwanji ovuba ono du ashi. Ephe a-tuko iphe, o nweru enweru natachaa ya go ha; l'o gbaru oto dabyiru. Ephe eria ya anu; gude oku kepyashia ya. ¹⁷Noo kele oo Chileke be yeru phe egube oriri ono lokpoma; go guje phe egu emeekbota iphe, Chileke tuberu, bu iya bu ge ndu ono swikoo ike phe; gokpoma buru phe nanu; k'opu ephe e-wota ali-eze phe ono woru ye ejo anu-egbudu ono leka go gude eka-ike buru eze phe jasu teke iphe, Chileke pfuru e-meekbota.

18 “Tẹme nwanị ono, ị hụmaru ono bụ mkpụkpụ ono, a maru ẹpha iya ono, bụ iya bụ eze; tẹme iphe, bụkotakpoo eze ndiphe l'ophu nọdu iya l'ẹka.”

Adada Bábilonu

18 ¹E mecha; mu bya ahụma ojozi-imigwe ọzo, shi l'igwe phezeta. Ọ bụru iya bẹ Chileke yeru ike parụ ẹka l'ẹka. Ogbu-nwịnwii ya tuko mgboko l'ophu ngaa. ²Ọ nọdu ara iya arara arashi iya ike su: “Eze mkpụkpụ Bábilonu daakwaru! Ọ daakwaru! Ọ bụakwaa ẹka mkpakọ-
iphe, bụkotakpoo ọbvu larụ ẹgu. Ọ bụakwaa ọkpoku unwu-ojozi Nsetanu l'ophu; mēkpoo ẹpfune-enu iphe, bụkpoo nwenu njo ọrà; mē ẹnu, dukota ndiphe ashị l'ophu. ³Noo l'ohamoha, nọkpoo lẹ mgboko ngwawaru mēe ya ono, bụ iya bụ apharwushi ono, nwanị ono apharwushi onwiya; tẹme ẹphe lẹ ndu eze ndiphe l'ophu zekotawaa. Tẹme iphe, bụ ndu agba oke-
ngho lẹ mgboko-a mgburugburu bẹ shiakwa l'ẹku ono, nwanị ono nweru ono, nyiberu g'aatu ọnu iya ono bụgbaaru eze.”

⁴Tobudu iya bụ; mu nūmakwa olu ọzo, shikwa l'imigwe sụ:

“Ndu mu; unu lufutakwa iya

l'ehu;

g'unu te eje eye ẹka l'eme

ejo-iphe, oome ono;

odumeka unu l'iya

a-gbakwaru

mgba l'ejo iphe-ememe,

a-byapfuta iya nū;

⁵ l'iphe-eji, oome kụkwaru

l'ikpo l'ikpo;

ha l'eli l'eli;

je

asupfuru l'akpaminigwe;

tẹme Chileke

nyataakwaru ejo ememe,

oomeje g'ọ ha.

⁶G'e mee ya g'o meru ndu ọzo;

g'a pfua ya ugwo iphe,

o meru;

pfua ya ya mpfukwase.

G'e gude mēe atsụ-be atsutsu

ugbo labo

gẹ nkiya gwajiaru iya

okoro,

o gude gwaaru ndu ọzo g'ọ

ngua.

7 G'a gwaa ya maa;
 nua ya aphu, habe
 g'ajaja ono, o jaru onwiya
 yee eku ono,
 nyiberu g'aatu onu iya ono,
 o kparu swibe onwiya ono.

G'e mee ya ya nno;
 eshinu o shi anoduje
 etu onwiya epha su:
 'Nta be mu nowa buru
 eze-nwanyi!

Mu ta anodu l'aphu nwanyi,
 ji iya anodedu ndzu.
 Ophu mu ta abyadu l'atsa
 onu l'aphu!

8 Noo g'o gude iphe,
 bu ejo iphe-ehuka ono,
 tukoru kwaberu iya
 nu ono;
 je l'a-tuko byapfutakota
 iya ujiku lanu,
 bu iya bu ejo iphe-ememe;
 waa aphu waa okpa nri.

Oku be e-tsufu iya nu;
 kele Nnajiuphu,
 bu Chileke;
 onye ike iya paru
 eka be bu iya nmaru
 iya ikpe."

9 Oo ya bu l'eze ndiphe ono, epe l'iya shi apharwushi onwophe ono me ndu ono, epe l'iya atukoje emegbaa ejo-iphe, agu phe nu ono; ndu ono l'a-ra ekwa iya; aphu eji phe obu l'opfu ehu iya m'ephe -humaephe g'enwuru-oku iya kpuufuru; l'eka oku etsupyashi iya. 10 Epe a-pfuru uzenya ele iya enya le ndzu agugu epfu su: "Nshio! Nshio eze Babilonu bu mkpukpu, a maru epha iya bya amaru g'ike iya beru; awa lanu be e gude nma ngu ikpe; i daa gi daru-a!"

11 Ndu agba ngho l'eliphe arakwaapho ejo ekwa nkephe gua aphu iya; kele o to nweedu onye azubaa phe aswa. 12 O to duedu onye azuje mkpola-ododo phe; ozoo mkpola-ochaa phe; ozoo ogbu nwijnwii mkpuma, bu mkpuma, vu oke aswa me igopoto phe. O to duedu onye azuje ekwa ochaa phe me ekwa uswe-uswe phe; me nkushu; buragidi uswe phe;

mekpoo oshi, eshi mkpo, bu iphe, ephe erekota erere; mekpoo iphemiphe, e gude eze-nyi kpua; mekpoo iphemiphe, bu iphe, e meru l'oshi, aswa du; me ophu e meru l'ope; ozo ophu e meru l'igwe; ozo ophu e meru le mkpuma-egbe; ¹³ mekpoo ekwo-ophe, bu sinamonu; me unwu iphe ozo, eshigbaa mkpo ge senti; me unwu-isensu; me meru; mekpoo furankisensu; mekpoo mee; mekpoo manu nri; mekpoo utu-witi; me witi lonwiya; mekpoo eswi; mekpoo aturu; me inya; me ugbo-inya; me ohu; mbu je akpachaa le nemadzu gedegede. ¹⁴ "Ha! Nta-a be iphe, bukotakpo akpuru oshi ono, shi aguje ngu agugu ono be ta aduedu. Eku ono, i shi kpaa swiphee onwongu ono be yifuakwaru nta; iphemiphe, bu iphe, atso-je ngu utso; teme o buru iphe, ama ngu mma bvwaru; ophu o bukwa li bya ahumabaa ya." ¹⁵ Ndu ngho ono, shi agbataje ngho iphemiphe ono je eree le mkpukpu ono rita iya oke urwu ono be a-pfugbaaru iya uzanya uzanya; kele ndzu a-nodu agu phe k'aphu ono, aanu mkpukpu ono. Ephe araa ejo-ekwa gua aphu asuje: ¹⁶ "Nshio! Nshio gube eze mkpukpu ono shi eyeje uwe ocha; me ekwa uswe-uswe; me buragidi uswe-uswe gude kwaa onwongu akwa ono! Gudekwapho iphe, e meru le mkpola memata onwiya ree; bya eworu echi, ere ire doo joo l'eka; bya ewojuer igopoto doo onwiya joo l'olu. ¹⁷ Lawa lanu-a kpoloko be e gudewaa mekota eku obu go ha; o bukotarula-la-l'iswi egube-a."

Iphe, bukpo ndu-ishi ugbo-mini g'ephe ha; me iphe, bukpo ndu egudeje ugbo eje; me ndu akpo ugbo; me ndu egudeje ugbo tsoru eze-enyimu agba ngho; g'ephe ha tukoru je apfugbaaru uzanya uzanya. ¹⁸ Wata echi mkpu teke ephe humaru enwuru-oku iya go kpuru tuuu l'eka oku etsu iya. Ephe epfuahaa su: ?O dukpoorua mkpukpu ozo, dujeru geze mkpukpu-a? ¹⁹ Ephe kpota urwuku kpube onwophe l'ishi. Ephe nodu echi mkpu ara ekwa; agu aphu su: "Nshio! Nshio gube eze mkpukpu, mbu gube mkpukpu ophu bu eku, nyiberu g'a-tu onu iya, i kparu be iphe, bukpo ndu gude ugbo phe tsoru eze-enyimu agba ngho shikota l'eka barahu buru eze! ?Awa lanu-a kpoloko be e gudewaa mekota iya; o buru la-la-l'iswi egube-a?"

²⁰ Teru eswa kpua ya gube igwe! Unube ndu-nsu; me ndu-ishi-ozu ono; me ndu mpfuchiru Chileke unu teje eswa le Chileke be nmawaru iya ikpe ejo-iphe ono, o meru unu ono!

²¹ Tobudu iya bu; ojozi-imigwe lanu, okpehu du; pata mkpuma, ha ge mkpuma-uswe paru chie leze-enyimu su: "Waa gee-gude okpehu chie mkpukpu ono, a maru epha iya ono, bu Babilonu l'eka o to dudu onye ahumabaa ya ozo bu owa-a. ²² O to dudu onye ahumabaa oda nkwa; ozo numabaa eka a gu ebvu; ozo ke ndu aphu upyi me ndu egbu opu l'ime gube mkpukpu ono ozobakpo ilile. O to dudu onye-ona, eme ona go-oduhabe ahumabaa l'ime ngu ozobakpo. Ophu a byadu ahumabaa ya oda ikwe-nri. ²³ Ophu iphoro oku oroku abyadu enwubakpo jaa l'ime ngu;

ophu o dudu onye anumabaa eka a no l'ime ngu eme uzere k'eka eeke nwanyị; ozoo k'eka a lutaru nwanyị k'òphúú. Noo l'ò kwa ndu ono, shi buru l'ime ngu agba ngho ono shigbaa buru ndu nweru enya l'eliphe-a. Teme i gude eme mgbashị; duphushikota ohamoha l'ophu mgburugburu.

²⁴“Teme o buru l'ime mkpukpu ono be a humaru mee ndu mpfuchiru Chileke me ndu-nsò; mekpoo mee iphe, bu ndu e gburu egbugbu l'eliphe g'ephe ha.”

19 ¹Ono mechaepho; mu numa olu-opfu ndu du igwerigwe epfu l'imigwe su: “Aliloya! Ge ndzota; me ogbu-nwijnwii; me okwabe ubvu; me ike; bukwaru ke Nnajiuphu anyi, bu Chileke anyi! ²L'ikpe, o kperu be bukwa ire-lanu; bya aburu ikpe, pfuru nhamunha. O nmaru eze-nwanyị ovuoba pho ikpe; mbu nwanyị ono, gude apharwushi onwonye mee unwu-eliphe l'ophu: ephe buru mkpurupyata-a. Chileke be gwataakwaru iya ugwo mee ndibe yebe Chileke ono, o gbushiru ono. Ochi phe tukoru iya l'ishi.” ³Ephe byakwa atua uzu ozo su: “Aliloya! Enwuru-oku, etsu mkpukpu ono kpa tuuu je atuko imeli l'ophu sweta. Noo g'ò-kpu iya jasụ le tuutuutu le mimiimii bu ono.” ⁴Ukporo ndu bu ogerenya le ndu bu ogerenya eno pho; waa iphe ono, nogbaa ndu ono ephen'eno tuko daa kpurumu baaru Chileke eja; mbu Chileke ono, no l'aba-eze ono. Ephe su: “Nokwa g'ò du-o. Aliloya!”

**Ete eswa nwanyị,
a luru k'òphúú**

⁵O duru olu, shi l'aba-eze ono su: “Unu jaa Chileke ajaja iphe, bu unu be ndu ejeru Chileke ozi g'unu ha; unu kele iya unube ndu atsụ iya ebvu; onye upfu me onye nta.” ⁶Mu bya anuma uzu, ndu du igwerigwe atu. O nodu adaepho g'eka mini aphu gbudugbudu; bya adahukwapho g'eka igwe ara ora; asuje: “Aliloya! O kwa Nnajiuphu, bu Chileke ono, bu Okalibe-Kakota-Ike ono bu Eze. ⁷G'ehu tsoo anyi utso; g'anyi tee eswa teshia ya ike; kwabe iya ubvu; kele nta-a be o ruwakwaru Nwaturu ono l'alụ nwanyị. Nwanyị obu, oobyala alulu obu be kwaakwaru onwiya akwa kwaberu iya. ⁸Chileke bya ekwewa go yee uwe ocha, egbu nwijnwii bya aburu asagu-mini.” Uwe ocha ono bu umere pfuru oto, ndu-nsò eme.

⁹Tobudu iya bu; ojozi-imigwe ono su mu: “Dee iphe-a l'ekwo: 'Ehu-utso be a goru nu ndu ono, e kuru g'ephe yiru le ndu e-ri nri, e gude eme eswa nwanyị ono, Nwaturu Chileke ono eje alulu onoya.’” O pfuchaa nno bya asu mu: “Opfu ono bukwa Chileke gude onu iya pfua ya.”

¹⁰Mu daa kpurumu l'iphu ojozi-imigwe ono jeshiaru iya abaru eja. O su mu: “Te ejekwa ememe! O kwa ge gubedua unu l'unwunna ngu phe bukota ndu ejeru Chileke ozi be bu ge mbedua bukwapho onye ejeru Chileke ozi; mbu unwunna ono, bu phe be Jizosu goshiru okpobe-opfu nkiya ono. Bachiaru Chileke eja. Lokpobe-opfu ono, Jizosu goshiru anyi ono be

bukwa l'ẹka Unme Chileke bẹ o shi; mbu Unme Chileke ono, bu iya emeje ge nemadzu pfuchijeru Chileke ono.”

Onye no l'eli inya ocha

¹¹“Mu bya ahuma g'imigwe gheru onu. Mu huma inya ocha, no iya nu. O duru onye no l'eli inya ono. Epha onye ono buru: O pfushiru ike l'iphe, o pfuru”; bya aburu “Okpobe-Opfu ono.” O nodu ekpeje ikpe, pfuru oto bya alwu ogo l'uzo, pfuru oto. ¹²Iphoro enya iya dupleho g'iphoro oku, enwu enwunwu. O kpuru okpu-eze, du igwerigwe l'ishi. O duru epha, e deshiru iya l'ehu, adudu onye maru iya nu gbahaa yebedua l'onwiya. ¹³O buru uwe, a tseru le mee be o yeru. Epha onye ono buru “Opfu Chileke” ono. ¹⁴Iphe, bu ndu ojogu, no l'imigwe gudegbaa uwe ocha, egbu nwiniwii bya aburu asagu-mini kwaa onwophe akwa. Epe tuko nodugbaa l'eli inya ocha awu etso onye ono, no l'eli inya ocha ono. ¹⁵Iphe, eshije lonu onye ono lufuta buru ogu-echi, atsụ nko, bu iphe, oogude lwua iphe, bu ohamoha, no le mgboko. Lo bya egude mgborigwe buru eze phe. O buru iya l'a-zoshi mee vayinu l'akpuru vayinu ono, bu iya bu eze oke-ehu-eghu ke Chileke, bu Okalibe-Kakota-Ike. ¹⁶E dee epha iya l'uwe, o yeru bya edee ya ya l'utapfu, bu iya bu: “Eze ndu eze; waa Nnajiuphu ndu bu nnajiuphu.”

¹⁷Mu bya ahuma ojozi-imigwe, pfuru l'ime enyanwu. O chia mkpu chishia ya ike gude kukota iphe, bukpo enu, epe l'akpaminigwe oku su: “Unu bya edzukobe ria nri, dashihuru unu; nri-enyashi ophu bu Chileke be o shi l'eka. ¹⁸Unu bya avukaa anu ndu eze; me anu ndu-ishi ojogu; me ke ndu ojogu l'onwophe; anu inya; me ndu agba iya nu; anu ndiphe l'ophu; amadu me ohu; ndu upfu me ndu nta.”

¹⁹Mu bya ahuma ejo anu-egbudu pho me ndu eze ndiphe mgburugburu g'ephe chitawaru ndu ojogu phe dokobe l'eka lanu g'ephe bya etsoo onye ono, no l'eli inya ocha ono ogo yee ndu ojogu iya. ²⁰A kpa ejo anu-egbudu ono le ndzu. E gudekwapho onye mpfuchiru ono, epfuje iphe, Chileke epfuduru ono. Oo ya be bu onye ono, shi abujeru: o -nodu ejo anu-egbudu ono l'iphu; l'o meshia iphe-ohumalenya-a, bu iya bu iphe ono, o gude dephua ndu ono, kweru g'a gbaa phe ngga ohubama k'ejo anu-egbudu ono; me ndu ono, shi abaru nteke, a kpuru o du go du ono eja. A kputachaa onye mpfuchiru ono l'epfuje iphe, Chileke epfuduru ono yee ejo anu-egbudu ono le ndzu je achiru ye leze iduma, bu oku nshiege enwu iya taphutaphu. ²¹Onye ono, no l'eli inya ocha ono bya egude ogu-echi ono, shi iya lonu alufuta ono gude tuko ndu ophu phoduru nu gbushikota. Iphe, bu enu, nokota le mgboko-a dzukoo bya avua anu phe kpata kpata; rijishia epho.

20 ¹Noo ya bu; mu bya ahuma ojozi-imigwe, shi l'imigwe abya. O gude ire-igodo onu iduma, enwedu ohu ono l'eka; bya

achikwarupho oke egbirigba. ²Ọ zuepho ejo-oke-agiyi ono gburumu; mbu agwo shi l'ichee ono, bu iya bukpo Obutuswe ono bya aburu iya bu Nsetanu. Ojozi-imigwe ono bya azu-gude iya kee ya egbu togbu; o zee legbu ono unu apha labo l'apha ukporo iri. ³Ojozi-imigwe ono paru iya chie l'ime iduma, enwedu ohu ono. O chiechaa ya bya eworu iya gu-chia; woru iya tu-chia okpobe atu-chi; k'ophu o dudu onye adu ike atuha iya nu. Oo ya bu g'oo too dephushihedu ndiphe ozobaa jasu teke unu apha labo l'apha ukporo iri ono buadaru. Teke unu apha labo l'apha ukporo iri ono buerupho l'e wehaa ya g'o kpa nwantusaru-ehu nwanshii.

⁴Noo ya; mu bya ahuma aba-eze aba-eze me ndu nogbaa ya nu. Ndu ono be bu ndu a hotaru dobe g'ephe kpeje ikpe. Mu humakwapho maa ndu a pfu-gburu apfu-gbu; opfu l'oo l'ephe pfuru l'edzudzu-oha pfua l'oo Jizosu bu Nnajiuphu; ndu shi asaje opfu Chileke asasa. Oo ephe bu ndu te ekwedu baaru ejo anu-egbudu ono yee nteke, a kpuru o du g'o du pho eja; ophu ephe ekwedu g'a gbaa phe ngga ohubama kejo anu-egbudu ono legedegege onu-iphu ozoo l'eka. Ephe tetachawaru nodu ndzu; ephe le Kereshi buwaru eze unu apha labo l'apha ukporo iri. ⁵Eteta k'ono, ndu a pfu-gburu apfu-gbu tetaru ono buru eteta k'ivuzo, Chileke meru nemadzu teta dzuru ndzu. Ndu ophu phoduru nu le ndu ono, nwuhuru anwuhu ono ta adukwa ophu tetaru nu jeye unu apha labo l'apha ukporo iri ono buebe. ⁶Ehu-utso yee adu-nso bu ke ndu a-yiru le ndu ivuzo ono, Chileke e-me g'ephe shi lonwu teta nodu ndzu ono. Onwu nwu-labo pho te erwudu phe aka; obenu l'ephe a-buru ndu-uke ke Chileke; waa ke Kereshi a-tuko buru eze l'eliphe unu apha labo l'apha ukporo iri ono.

A Iwu-kperu Nsetanu

⁷Teke unu apha labo l'ukporo apha iri ono buerupho; l'aa-tofu Nsetanu legbu ono l'oo-lufuta le mkporo ono, a turu iya ono. ⁸Looshi l'eka ono byatashikwa edepushi ohamoha, nokpo le mgboko mgburugburu, bu iya bu Gogu yee Megogu. Lookpakobe phe l'eka lanu gude phe dzua ugu. Ndu bu e-jeshia phe agugu ephe aha g'eja, no l'ali. ⁹No iya; ndu ono zoru garamu garamu le phorokotoko eli-mgboko-a; bya ano-phekota aka ono, ndu ke Chileke doru ono mgburugburu; no-phekwaapho mkpukpu ono, Chileke yeru obu ono. Obenu l'oku shiepho l'imigwe nwua ke phuruphuruphu bya ekegbushikota phe. ¹⁰A bya eworu Obutuswe, bu iya l'anoduje eduphushi phe ono bya eworu chie leze iduma ono, bu oku nshi-egbe lenwue ya pho taphu-taphu ono, bu iya bu aka ejo anu-egbudu pho yee onye mpfuchiru pho l'epfujephe, Chileke epfuduru ono no. O buru aka ono be ephe a-nodu l'aa-nua phe chiipfu eswe lenyashi jasu le tuutuutu le mijimiimii.

Ikpe ikpazu

¹¹Mu bya ahuma oke aba-eze acha ucha; bya ahumakwapho onye no iya nu. Igwe me ali phota oso; shi iya l'iphu gbafu. Ophu o duedu aka ephe

a-nọdu. ¹² Mu hụmakwapho iphe, bụkpoo ndu nwụhuru anwụhu; ndu upfu mę ndu nta; ẹka ẹphe pfulgbaaru l'iphe aba-eze ono. A bya e kpulhashia ẹkwo ghebe onu; a bya ekpuhakwaapho ẹkwo lanu ozo; ono buru ẹkwo ndu no ndzu. O buru iphe, e deru l'ẹkwo ono be e gude ekpe ndu nwụhuru anwụhu ikpe le g'iphe onyemonye meru gbaru. ¹³ Eze-onyimu bya atuko ndu o rijekporu chifutabebe. Anwụhu yee ali-maa tuko ndu onwu gbuje-kporu chifutabebe. A tuko g'ẹphe ha kpee ikpe. E kpee onyemonye ikpe g'iphe, o meru gbaru. ¹⁴ A chiru mgbu-onwu yee ali-maa chiru ye leze iduma ono, oku enwu taphutaphu ono. Ono buru onwu nwu-labo. ¹⁵ Onyemonye, a hụmaduru ẹpha iya l'ẹkwo, e deshuru ẹpha ndu a-nọdu ndzu ojeoje pho be e chieru leze iduma ono, oku enwu taphutaphu ono.

Imigwe ọphúú mę ali ọphúú

21 ¹ Tọbudu iya bu; mu bya ahuma igwe ọphúú bya ahuma ali ọphúú; kele igwe ophu shi du nu ta aduedu; ophu ali ophu shi du nu aduhedu. Ophu eze-onyimu aduedu. ² Mu bya ahuma mkpukpu, du nsọ ono, bu iya bu Jierúsalemu ọphúú. Mu huma iya g'o shi l'imigwe ẹka Chileke no alwazeta l'ali. E memakpoe ya pho ge nwanyi, abya ala ji; mbu nwanyi, a kwawaru akwa g'oo-du yee ji iya aswuru. ³ Mu numa olu, a no l'aba-eze ono chia g'e chiru mkpu su: "Wakwa ibe Chileke ba-o! Nta-a be Chileke byaakwaru anodu swiru nemadzu eswiru. Nta-a buakwaa ẹka nemadzu bu be bu ẹka Chileke e-buru; nemadzu aburu ndibe iya. Chileke lonwiya eswiru phe eswiru; buru Chileke phe. ⁴ Oo-hushichaa phe ẹnya-mini ẹkwa phe. Anwụhu ta adubaedu; ophu atsu aphu a-duhedu; ophu aarahedu ẹkwa; ophu o duedu iphe emebaa nemadzu ehuka; kele iphe ono, shi dukota nu ono buwaru."

⁵ Tọbudu iya bu; onye ono, no l'aba-eze ono su: "Lenu; nta-a be mu emeakwaa iphemiphe g'o bukotaru iphe ọphúú." O sukwa mu pho-a: "Tuko opfu-a dee l'ẹkwo; noo lo bukota okpobe-opfu bya abukwarupho opfu, gbaru g'e gude iya ẹka." ⁶ O bya asu mu: "E meakwaru iya! O kwa mbedua bu Alufa bya aburu Omega; Onye mbu me Onye ikpazu. Iphe, bupoo onye mini agu be mu e-kekwa mini shi logba mini anuje ndzu ke mmanu. ⁷ O kwa onye alwuje ugu ono lwuta l'e-nworu iphemiphe. Mu aburu Chileke onye ono; onye ono aburu nwa mu."

⁸ Obenu ke ndu ono, atsu ebvu ẹnya ono; me ndu ono, ekwedu nu ono; me ndu ono eme ejo ahuma ono; me ndu egbu nemadzu; me ndu eme ke nwanyi; me ndu mgbashi; me ndu anoduje agwa iphe; me ndu adzufe uka g'ẹphe ha; ndu ono be iphe no swiru phe nu bu eze iduma ono, oku me nshigbe enwu taphutaphu ono, bu iya bu onwu nnwu labo.

Jierúsalemu ọphúú ono

⁹ Tọbudu iya bu; ojozi-imigwe lanu l'ime ojozi esaa ono, shi paru ochi ejo iphe-ememe esaa ikpazu pho byapfuta mu bya asu mu: "Bya ge mu je

egoshi ngu nwanyị òphúú ono, l'abya ala ji ono, bụ iya bụ nyee Nwaturu Chileke onoya.”¹⁰ Unme Chileke bya ejię mu phọ ẹhu. Ojozi-imigwe pho duta mu je enyihu ephekerephe úbvú, ha l'eli ntụmatu. O je egoshi mu mkpụkpu ono, dụ nsọ, bụ iya bụ Jierúsalemụ g'o shi l'imigwe ẹka Chileke nọ alwazeta l'ali.¹¹ Ogbu-nwịinwii kẹ Chileke mee ya ọ nọdu eke kẹ zaa zaa. Ìphóró iya nọdu eke zaa zaa gẹ kẹ mkpuma, bụ iya bẹ aswa ka-kọta; mbụ ìphóró dụepho gẹ kẹ mkpuma jíásùpà. Mkpuma ọbu anọduje ama mma; bya aphụ ngerengere.¹² Mkpụkpu ono bẹ e gude igbulọ kpupheta mgburugburu. Igbulọ ọbu haepho mebyikpọọ kẹ phengara. E bua ya ọnu-abata uzi iri l'ẹbo. E ye unwu-ojozi-imigwe iri l'ẹbo g'ẹphe cheje ọnu-abata iri l'ẹbo ono nche. L'ọnu-abata ono ephe n'iri l'ẹbo bẹ e degbachaarụ ẹpha ipfu iri l'ẹbo ono, dụ lẹ Ízurelụ l'ẹhu l'ẹhu.¹³ E bua ọnu-abata ẹto l'uzo ọphu gharu iphu l'uzo ẹnyanwu awawa; a bya ebua ọnu-uzo ẹto l'uzo ẹnyanwu arība; bya ebua ọnu-uzo ẹto l'uzo isheli; bya ebua ọnu-uzo ẹto l'uzo ndọhali.¹⁴ Ọ bụru mkpuma iri l'ẹbo bẹ e gude t̄a ọkpa igbulọ mkpụkpu ono mgburugburu. Mkpuma ono ephe n'iri l'ẹbo bẹ e deshiru ẹpha ndu-ishi-ozí iri l'ẹbo; mbụ ndu-ishi-ozí Nwaturu ono.

¹⁵ Ojozi-imigwe ono, shi epfu anụ mu nụ ono bẹ gude ogugu mkpọla-ododo, oo-gude t̄a mkpụkpu ono yẹle ọnu-abata iya yẹle igbulọ iya kpọo.¹⁶ Mkpụkpu ono nweru mgburekụ ẹno, haepho ẹnya nhamunha. Ọ bya egude ogugu t̄a ya. Iphe, ọ d̄ugbaa l'ogologo iya mę uswekete iya mę eli iya mękwapho ọsa iya b̄uru unu manyịru ugbo ẹto lẹ manyịru ụkporo iri l'ise.¹⁷ Ọ bya at̄a igbulọ iya; igbidigbi iya d̄u nt̄u ọkpa ụkporo labo lẹ nt̄u ọkpa ẹsato lẹ gẹ ndiphe atuje iphe. Noo g'ojosi-imigwe ono t̄uru iya.¹⁸ Iphe, e gude kp̄a igbulọ ono b̄uru mkpuma jíásùpà. Mkpụkpu l'onwiya b̄uru mkpọla-ododo bẹ e gude mee ya. Ọ nọdu aphụ ngerengere g'onyo.¹⁹ Ọkpa igbulọ ono bẹ e gudegbaa mkpuma, d̄u iche iche, ereshigbaa ire ike bya aphugbaa ngerengere gude mee ya; ọ nọdu ama mma. Mkpuma ono kẹ mb̄u b̄u jíásùpà; k'ẹbo b̄uru sáfayà; k'ẹto b̄uru ágètù; k'ẹno b̄uru émèràlùdú; ²⁰ k'ise b̄uru ónikùsù; k'ishii b̄uru kanéliyànù; k'ẹsaa b̄uru k̄irísòlàyitù; k'ẹsato b̄uru bérilù; kẹ tete b̄uru tópàzù; k'iri b̄uru k̄irísòpù-ràsù; k'iri lẹ nanu b̄uru jíásintù; k'iri l'ẹbo b̄uru ámitisùtù.²¹ Ọnu-uzo iri l'ẹbo ono b̄uru igopoto iri l'ẹbo bẹ e gude mee ya. Ọnu-uzo ono ephe n'iri l'ẹbo l'ẹhu l'ẹhu b̄ukotarụ igopoto lanu bẹ e gude mee ya. Ọma oji ime mkpụkpu b̄uru mkpọla, guru egugu bẹ e gude mee ya. Ọ nọdu aphụ kẹ ngerengere g'onyo.

²² Ọphu ọ d̄udu eze-ulo Chileke, mu h̄umaru l'ime mkpụkpu ono; kẹle Nnajiuphu b̄u Chileke, b̄u iya b̄u Ọkalibe-Kakota-Ike yee Nwaturu ono b̄uwaa eze-ulo Chileke kẹ mkpụkpu ono.²³ Mkpụkpu ono ta ad̄edu iphe, o gude ẹnyanwu eme; ọphu ọ d̄ukwapho iphe, o gude ọnwa eme. Noo kẹle ogbu-nwịinwii Chileke bẹ echiwa l'ime iya. Nwaturu Chileke ono b̄uru ìphóró, e gude aphụ uzo.²⁴ Ọ b̄uru ìphóró, shi lẹ mkpụkpu ono bẹ

ọhamoha e-gude nọdu ndzụ. Iphe, bụkpoo ndu eze, nọkota lẹ mgboko evukọo ọdu-biribiri pẹ vubata l'ime mkpụkpu ono. ²⁵ Ọnu-abata mkpụkpu ono e-ghekọtajeru ọnu tekenteke; kele ẹnyasi ta abyakpodaanu adu l'eka ono. ²⁶ Ọhamoha, du l'eliphe be a-tuko ọdu-biribiri, ephe nweru enweru vutakota bya akube lẹ mkpụkpu ono; ephe akwabe mkpụkpu ono ubvu. ²⁷ Ole o to dukwanu iphe, aaso nso, byaru abahu lẹ mkpụkpu ono. Onye eme ejo ememe m'onye adzu aka be e te ekwekwa g'o bahu iya. Ndu a-bahu iya nu kpoloko buepho ndu e deru epha pẹ l'ekwo Nwaturu ono, bukwanu eka e deshuru epha ndu a-nọ ndzụ ojejoje.

22 ¹ Tọbudu iya bu; ojozi-imigwe ono bya egoshi mu nggele, bu iya bu mini obu, lanuje ndzụ ojejoje obu. O doepho risaa apuaphepo ke ngerengere g'onyo. O buru eka o shi asofuta bu l'aba-eze Chileke yee ke Nwaturu onoya. ² Mini ono nọdu asoepho l'echi oji mkpụkpu onoya. Oshi, anuje ndzụ ojejoje pfulgbaaru nggele ono ibe k'ebọ ebo. Oshi ono amije uzi akpuru iri l'ebọ, dugbaa iche iche bya ami nno l'onwa l'onwa ugbo iri l'ebọ l'apha. O buru ekwo oshi ono be aakpataje gude mebe ohamoha obvu l'iphe, eme pẹ nu; ephe ewekorohu. ³ Ophu o dudu iphe, Chileke turu ọnu anodubaa l'ime mkpụkpu ono.

Iphe, a-du lẹ mkpụkpu ono bu aba-eze Chileke yee ke Nwaturu ono. Ndu ejeru iya ozi a-nọdu abaru iya eja. ⁴ Ndu ono, ejeru iya ozi ono a-hu-maje iya l'iphu l'iphu. Epha iya be ee-dechaa pẹ l'egedegee ọnu-iphu. ⁵ Enyasi ta aduhedu. Mkpa iphoro oroku; ozoo k'enyanywu ta adureduru pẹ ozo; kele Nnajiuphu, bu Chileke l'a-buru iphoro pẹ. Ephe aburu eze jasụ lẹ tuutuutu lẹ mimiimii.

Abyabya Jizosu

⁶ Noo ya; ojozi-imigwe ono su mu: "Opfu-a g'o ha bukotakwa okpobe-opfu bya aburu opfu, gbaru ke g'e gude iya eka. Le Nnajiuphu, bu iya bu Chileke ono anuje ndu ono, epfuchiru iya nu Unme iya ono be ziakwaru ojozi-imigwe g'o bya egoshi ndu ejeru yebẹ Nnajiuphu ono ozi iphe, adudu g'oo-nọ-beru loomee."

⁷ Lekwa; mu abyakwaa egwegwa! Ehu-utso be a goru nu onye emeje iphemiphe-a, e deru l'ekwo mpfuchiru-a."

⁸ Mube Jionu gedegede bu onye numakotaru iphemiphe-a le nchi mu; bya ahuma iya lenya. Mu numachaa ya ono bya ahumachaa ya ono; mu daa kpurumu l'iphu ojozi-imigwe ono, goshiru mu iya nu ono jeshiaru iya abaru eja. ⁹ O su mu: Te ejekwa ememe! "O kwa ge gubedua unu l'unwunna ngu bu ndu ejeru Chileke ozi-a bu ge mbedua bukwaphe onye ejeru Chileke ozi; mbu unwunna ngu bukwa ndu ono, epfuchiru Chileke me ndu ozo, emeje iphe, ekwo-a pfuru. O Chileke be ii-bachiaru eja." ¹⁰ O su mu: "G'o to dukwa opfu, e deru l'ekwo-a me nanu, ii-domi edomi. Le teke iphemiphe-a e-mekota be dukwaa ntse. ¹¹ G'iphe, bu ndu emeje ejo-iphe

kwaækwapho l'eme ejo-iphe, ephe eme. Gẹ ndu eme umere, rehuru erehu kwaækwapho l'eme ejo umere, rehuru erehu, ephe eme. Gẹ ndu ophu pfulbekwanuru-eka-oto l'iphu Chileke gudeepho eka phe g'ephe gude iya. G'onye doberu onwiya Chileke iche dobeækwarupho onwiya Chileke iche g'o doberu iya.

¹² “Mu sùru-a; mu abyaakwaa nta-a nta-a! Mu -byatashia bẹ mu e-gude iphe obunggo, mu e-bu onyenonu nggo g'iphe, o meru gbaru. ¹³ O kwa mbèdua bụ Alufa bya aburu Omega. Mu bụ onye Ivuzo bya aburu onye Ikpazu. O buru mu bụ mgbube ishi iphemiphe; bya aburu mu bụ eka iphemiphe sùberu ishi.”

¹⁴ Ehu-utso, bẹ a goru nù ndu asajẹ awurukpata uwe phe l'ochia kẹ pemu pemu; kẹle ọo phe bẹ ee-kwe g'ephe wotaje akpuru, oshi ono, anuje ndzu ojejeje ono mitaru; riye. O buru phe bẹ ee-kwe g'ephe shi l'onu-uzo bahu l'ime mkpukpu ono, Chileke no ono. ¹⁵ Obenu lẹ ndu ono, bụ nkuta ono; mẹ ndu mgbashi ono; mẹ ndu apharwushi onwophe ephe l'unwanyi; mẹ ndu egbu nemadzu; mẹ ndu anoduje agwaphe iphe; mẹ ndu abujeru; onye ozo -nodu adzu uka l'ootso phe utso; teme ephe nodu adzu uka l'onwophe; ndu ono g'ephe ha bụ l'azu mkpukpu ono bẹ ephe a-nodu.

¹⁶ “O kwa mbèdua, bụ Jizosu gedegede bẹ ziru ojozi-imigwe mu g'o bya emee g'unube Chiochi makotaru iphemiphe-a. Mu bụ eri Dévidi bya aburu oshilokpa iya. Mu bukwarupho kpokpode nchi-abohu ono, anoduje eke paapaapa onoya.”

¹⁷ Unme Chileke ono yee nwanyi ophuu ono tuko su: “Bya-o!” G'onye numakpooru iphe-a su: “Bya-o!” G'onye egu mini agu byakwa! G'onye o du iya g'o bya byakwa g'e kee ya ya kẹ mmanu g'o ngua. O kwa mini ono anuje ndzu ojejeje.

Mkpochi-ishi iya

¹⁸ Iphe, bụ onye anu opfu-a, e dekotaru lekwo-mpfuchiru-a; bẹ mu alo eka lẹ nchi. Onye bụ onye yekwaru iphe, l'iphe-a, e deru lekwo-a bẹ Chileke e-yekwakwa iphe, l'iphe, bukotakpoo ejo iphe-ehuka, e pfukotaru opfu iya lekwo-a; tuko iya byabẹ onye ono l'ishi. ¹⁹ Teke o dukwanuru onye wofuru iphe ewofu lekwo mpfuchiru-a bẹ Chileke e-wofukwa okiphe onye ono l'akpuru, o mitaru; mbu oshi ono, anuje ndzu ojejeje ono; oshi ono, e pfuru opfu iya lekwo-a; wofukwapho okiphe nkiya lẹ mkpukpu, du nsọ ono, bukwaphe iphe, e pfuru opfu iya lekwo-a.

²⁰ Oo onye ono, meru g'a maru l'iphemiphe-a bukota okpobe-opfu bẹ sùru: “Ee; mu abyaakwaa nta-a nta-a.”

O noo g'o du. “Jiko bya; Nnajiuphu, bụ Jizosu!”

²¹ Gẹ Nnajiuphu, bụ Jizosu; bya aburu Kéreshi meeru unu eze-iphe-oma g'unu ha. Nokwa g'o du.